

Aposel

Jesus Saa Ilun Yale Irou Iselen

¹ Teofilus, uruwa buk aya atoton anī bun, Jesus gariya ino, ereb ereb age fen ado ifelnēdif ile, ² aposel ī igirnēdin anidi Awa Uur Fateul bunem faded fiye keleid fen, Jesus saa ilun iselen nē naa bun, aya anī ganān nigin atoton. ³ Ī darau yale fen, laa fen, mata kel fā ye fen, tamo eneidi meleid bun wō yen, agef fen, idi ī mata ibodok ya anī momoi douf nigin, ereb ereb musei age fen. Naa foti anī namen, ī idi meleid bun wō ye fen, Negur tano nigin wogō fiyēdin. ⁴ Jesus idi geid saaf doko dibod ken, ī idi eig ye fadim yukenēdin, “Ā Jerusalem to utorōgouf, anī ere, ereb aya wogō au di, karī gen, are neu Dei ereb sur afouf yen anī tari gouf. ⁵ Are Jon ī naan nem dogol igunein, anī ere, naa tunī ilele di, ā Awa Uur Fateulem naan iguneif.”

⁶ Anī nigin, sain idi takai guru de dibod ken, idi ī to difiyen, “Oduḡ, ō sain enei bun, Israel neid tano baban unouf de?”

⁷ Jesus idi irokenēdin, “Are Dei ī yogon megeir bunem, sain nanī be naa inon ibodok anī, ā to keleī youf. ⁸ Anī ere, ā fau sain Awa Uur Fateul ā bun isiyouf are, megeir walogouf, agog fen, ā aya age afen anī nigin wogōḡ fen, Jerusalem bun, Judia distrik ado Samaria distrik ganān bun ile, teneub idikeleya buneg, aya nigin wogō gouf.”

⁹ Ì enei irokkel fen, idi meleid bun bagai, ì yale irou iselen, ì lalo bun iminkele di, to dilen.

¹⁰ Jesus isele di, idi saa ilun ditad se, lo difef den mog, kaisã bagai tamo uru kolos lalau adodo, idi siridin difaren. ¹¹ Idi diron, “Galili tamo ã, ere nigin ein ufareg utadseg fen, saa ilun lo gef? Jesus enei ã bun tamal yale irou, saa ilun iselel, ã ì saa ilun isel mog, ulegel kilei bagai, agef ì kel isiyouf.”

Judas Fotokar Matias Digirin

¹² Age de fen, idi Moul Arei dedig bun tamal, Jerusalem keku de dilen, Moul Areinem Jerusalem ileya are wan kilomita age fiya, anñ nigin, Sabat naa* bun iyõya kisi feleya. ¹³ Sain idi Jerusalem wõ de fen, idi aab ilun dibodõdig nẽ an diselen, idi eneidim, Pita, Jon, Jems, Endru, Filip, Tomas, Batolomyu, Matyu, Jems Alfeus naal, Simon Selot† taka, Judas Jems naal. ¹⁴ Idi ganan guru de, waud tekelei dino fen, toku kosẽ dedig, kayau tunĩ geid, Maria Jesus sina, Jesus tura tar geid.

¹⁵ Sain anñ bun, Pita, momoiya tamo kayau handred tuwenti age fiya idi atun, ifar fen, iron, ¹⁶ “Turau tar, kulu Awa Uur Fateulem Dawid sigoron, Judas ì tamo uyu iroukenẽdi di, Jesus dalen ì nigin wogõ yen anñ, Negur nẽ Itotoya bun ibodok, are de agef kisi felen. ¹⁷ Ì amã nemã taka, ì amã weim kabĩ enei malen.”

¹⁸ (Judas yogon sane bunem moni yale fen, teneub taka na yalen, an ì kubũ ye mudur iten ken, yogon bouwa faraf fen, te galelei adok ulõ

* **1:12:** Sabat naa anñ, Juda neid uub nẽ naa. † **1:13:** Juda neid kusĩ mala taka, idi Rom gawaman ado kusĩ dedig.

yesin. ¹⁹ Age fe di, tamo kayau Jerusalem dibodon anĩ ganan, od anĩ karĩ den, anĩ nigin, teneub anĩ, dogo neid od nem yana dũ Akeldama den, anĩ nē gariya, Naud Teneub.)

²⁰ Pita wogō tobol fe, irokeneg iron, “Buk Sam bun eig ye itoton,

“ ‘Yogon modoũ are fonou inouf,

an taka nem to ibodōf,’[‡]

takag,

“ ‘Taka nem ĩ fotokar yogon kabĩ yalouf.’[§]

²¹ Anĩ nigin, Odug Jesus ada atun kabĩ yale ilef isif mog, ²² Jon naan igunēdin sain bunem ile, Jesus ada bun tamal, yale irou iselen sain bun, sain ganan ada weim tabodon anidi taka tagirnēf. Are idi eneidi atun, takam Jesus mata kel fāya nigin, ada geid od wogō tauf.”

²³ Anĩ nigin, idi tamo uru dinenēdin, Josef Basabas dedig (yana taka Jastus), taka Matias.

²⁴ Age de fen, idi kosē de fen, diron, “Odug, tamo ganan neid waud õ keleĩ, uru eneidi bun, õ aib ugin anĩ ufelnamã, ²⁵ are Judas ĩ itor ken, yogon modoũ bun ilen anĩ, ĩ fotokar aposel kabĩ yalouf nigin.” ²⁶ Age de fen, idi aisaĩ dira ken, aisaĩ Matias wagen kubũ yen, anĩ bunem, Matias ĩ aposel ilewen baguf weimen.

2

Awa Uur Fateul Pentikos Naa Bun Isin

¹ Sain Pentikos naa* isi di, idi ganan modoũ tekelei bun, guru de dibodon. ² Idi an dibod mog,

[‡] **1:20:** Sam 69:25 **§ 1:20:** Sam 109:8 * **2:1:** Naa anĩ are, Pasa naa bunem naa fifti ilele di, wõ yedig.

kaisã bagai, ait yau total ado gugu redig gen, saa ilun tamal isi fen, fõ aab ino yalen. ³ Idi ereb yã bale gen isi di, dile mog, fara furu feid, idi mugu mugu tetedin ibodon. ⁴ Age fe di, idi ganan Awa Uur Fateulem aura fiyēdi di, gariya dino, od fire fire bunem wogõ den, Awa Uurem fiyēdi di, age difen.

⁵ Sain anĩ bun, Juda tamo Negur nigin momoi den idi, teneub ganan bun temeleid disi, Jerusalem dibodon. ⁶ Sain idi ait anĩ karĩ de fen, tamo kayau musei idi nene de fen, guru difen, ere nigin, idi mugu mugu dogo neid od bun wogõ den anĩ karĩ den. ⁷ Idi fatuk bagai terē de fen, diron, “Tamo od wogõ def eneidi ganan, Galili temeleid sã de? ⁸ Naig fe di, ada mugu mugu, idi neda od bunem wogõ de di, karĩ tauf? ⁹ Ada fire firen temelada, Patia, Media, Elam kantri, Mesopotamia, Judia distrik, Kapadosia, Pontus, Asia provins, ¹⁰ Frigia, Pamfilia distrik, Isip kantri ado Libia distrik tunĩ Sairini taun non. Amã tunĩ Rom kantri temelamã, Juda temeleid ado haiden Juda neid momoiya bun falei maun, ¹¹ Krit nuyo ado Arabia distrik. Ada mugu mugu neda od bun, Negur kabĩ odug age fen anĩ wogõ de di, karĩ tauf.” ¹² Idi terē de nene de fen, abob toti difen, “Eĩ ere gariya nigin?”

¹³ Anĩ ere, tunĩ idi weli difiyeid diron, “Idi wain fatuk domõ.”

Pita Tamo Kayau Meleid Bun Wogõ Yen

¹⁴ Pita aposel ilewen geid difar fen, ait odugem tamo kayau wogõ fiyēdin, “Juda tamo kayau ado ã ganan Jerusalem ubodõgef, utorõg len, aya ã enei

faded ayeĩf, kee releg fen, aya wogõ auf anĩ karĩg.

15 ã kisi gef, tamo eneidi wain domõ gef, age fiya sã, gama eĩ nain kilok bonimeĩ! 16 Anĩ ere, eĩ are Profet Joel eig ye wogõ yen:

17 “Negur irok, idikeleya naa bun,
aya neu Awa Uur, tamo kayau ganan bun gõ
afalauf.

Age afe di, ãgenei kesu, kayau momoul ado, profet
od wogõ douf,
ãgenei tamo gaũ meleid bun seleulã kurã
fouf,
ãgenei tamo tubau dimĩdiyof.

18 Neu ferfer tamo ado kayau geid buneg,
aya neu Awa Uur naa anĩ bun gõ afalaisi di,
idi profet od wogõ douf.

19 Aya saa ilun, memelik fire fire afelnēdiyof,
tenebur ein uris anodiyof.
Naud, yã ado, kaau tubutubuya wõ youf.

20 Odug nē Naa odug fula fiya medeĩya ado, fau to
isi mog,
gaa gugum kele fen,
ogõ naud gen wõ youf.

21 Age fe di, aib taka ĩ, Odug yana yale iweignēf
are,
Odug ĩ kel yalouf.†

22 “Israel tamo kayau, od enei karĩg, ã aug
keleĩ, Negur ã atun, Jesus Nasaret tamal bunem
memelik, erēb urug bagai ado, uris inodin, anĩ
bunem Jesus ĩ Negurem sur fiyen anĩ, Negur ã
ifelnein. 23 Tamo enei nigin, Negurem erēb erēb
wõya sã mog, yogon keleĩ ado kisi bunem, ĩ ã imeĩ
bun inon, age fe di, ã tamo sesenem disenneĩ di, ĩ

† 2:21: Joel 2:28-32

laa fouf nigin, aa tetek bun tuti nem ũgen. ²⁴ Anĩ ere, Negur ĩ laa bun tamal turĩ fe di, mata kel fã yen, laa nẽ darau bun tamal yalelnen, ere nigin, laa anim ĩ irouněya kisi feleya sã. ²⁵ Are Dawid ĩ nigin iron:

“ ‘Odug sain faimud malau bun ifar mog, ailedig.
 ĩ aya imau biyalem ibodok nigin,
 aya to kumĩ au fen, terẽ auf.

²⁶ Anĩ nigin, neu wau seref fen, sigorou seli abidig,
 aya, ereb Negur aya bun biya age fouf anĩ tari afedig,

²⁷ ere nigin, õ neu malaukanon to utorně di,
 bouwau laa neid modoũ bun ibodõf,
 õ ogon Fateuleg to utorõ di, bura lauf.

²⁸ Õ mata bun ileyã nẽ naab ufelna fen,
 õ malã bun kulĩya barikã wiyauf. ‡

²⁹ “Turau tar, aya ã yaor arokeneik, tubuda Dawid ĩ laa fe di, mũ difen. Yogon matmat, ada atun naa enei bun fau ibodok. ³⁰ Anĩ ere, ĩ profet taka, anĩ nigin, ĩ keleĩ, Negur wau kuturol fen, Dawid yogon ibor nẽ tubu tar bun tamal taka, yogon king nẽ sia bun ineněf nigin irokenen. ³¹ Dawid ĩ ereb fau wõya sã mog, anĩ tetunem ile fen, Kristus mata kel fã youf nigin eig ye wogõ yen, ‘Ĩ laa neid modoũ bun to ibodõf, ĩ bouwag to bura lauf,’ yen. ³² Negur Jesus enei turĩ fe di, ĩ mata kel fã yen anĩ, amã ganã mailen. ³³ Negur ĩ ima biyalem yalesnẽ di, Jesus ĩ, Tama bun Awa Uur Fateul Negur afeneĩf yen anĩ yale fen, fi felen,

‡ **2:28:** Sam 16:8-11

are ã gama ulegef ado karĩ gef anĩ. ³⁴ Dawid saa ilun to iselen, anĩ ere, ã iron,

“Negur neu Odug irokenen:

“Imau biya melem ubod mog,

³⁵ ogon kiwai tar

ogon ye inoya nẽ sawa anodiyouf.” ’§

³⁶ “Anĩ nigin, Israel tamo kayau ganan enei keleĩ bagai youf, Jesus enei ã aa tetek bun uke-sigen anĩ, Negur yogo, Odug ado Kristus inenen.”

³⁷ Tamo kayau od enei karĩ de fen, idi waud gudũ fe di, Pita aposel tunĩ ganan geid diro-kenẽdin, “Turamã tar, amã naig mafouf?”

³⁸ Pita solof irokenẽdin, “Ã mugu mugu wauĩ falei wog fen, Jesus yana bunem naan iguneĩ di, ãgenei mosor nigin weder tu kalauf, ago ge di, ege luwa are Awa Uur Fateul walogouf. ³⁹ Promis od are ãgenei, ãgenei kesu tar ado, idi gerõ difaref ani ganan neid, are Odug neda Negur iweignẽdiyof anĩ ganan neid.”

⁴⁰ Age ye fen, Pita od musei bun, idi wedereid irou fen, total irokenẽdin, “Ã aug isenneĩf nigin, tamo kayau sane sain enei bun tamal urab urai-leg.” ⁴¹ Yogon od dalen idi naan igunẽdin, age dife di, naa anĩ bun, tri tausen tamo kayau age fiya, idi neid bun tobol difen.

Momoiya Tamo Kayau Neid Uyu Kũ Fiya

⁴² Idi aposel neid ifelnẽdiya, uyu kũ fiya, saaf weim yõya, kosẽya bun, idi neid kisi adok dino fen, age difen. ⁴³ Tamo kayau ganan terẽ de inid ifitin. Age dife di, aposel idi, uris ado memelik musei dinon. ⁴⁴ Momoiya tamo kayau ganan

§ 2:35: Sam 110:1

weim dibod ken, safineid ganan gadō difedig. ⁴⁵ Safineid na nigin sur difeid fen, taka ĩ lau fef anĩ difenēdig. ⁴⁶ Naa ganan idi toku waud tekelei fen, tempel modoũ bun guru difedig. Idi dogo neid fō fō bun, kulīya ado waud adok an yen ken, weim saaf dōdig. ⁴⁷ Idi Negur yana dalesedig, tamo kayau ganan, idi nigin biya difiyēdidig, age dife di, Odug naa ganan bun, tamo kayau kel gei feid fen, idi neid bun tobol fedig.

3

Pita Tamo Nonĩ Tamal Ye Ilolaisin El Fiyen

¹ Naa taka bun, Pita Jon ado, tri kilok aragau kosēya sain nigin, tempel bun diselen. ² Tamo taka sina namen ye ilolaisin gō fen, tempel bobog yana ‘Meli Bagai’ dedig an faali de diroulen, an naa ganan bun dinenē di, ibod ken, tempel bun dilef anidi moni nigin nonĩ fiyēdidig. ³ Sain Pita Jon ado, tempel namen dilau fenē age dife di, ileid fen, moni nigin irokenēdin. ⁴ Anĩ ere, Pita Jon ado, ĩ lo difel fen, Pita iron, “Amã lo wamã!” ⁵ Age ye di, ĩ ereb difanauf ye fen, lo feidlen.

⁶ Age fe di, Pita iron, “Silwa be gol are aya sã, anĩ ere, ereb aya ado anĩ, õ afonok, are Jesus Kristus Nasaret tamal yana bunem uyõ.” ⁷ Age ye fen, Pita tamo ima biyalē yale iroune ken, isennē yalesnen, kaisã bagai tamo nē ye guyu totoledin. ⁸ ĩ gurusã ye ifar fen, iyōya gariya inon. Agef fen, ĩ weim tempel namen dilen, iyō, gurusã ye fen, Negur yana yalesen. ⁹ Tamo kayau ganan ĩ iyo ken, Negur yana yalese di, dile fen, ¹⁰ idi, im bagai tempel bobog yana ‘Meli Bagai’ dedig bun ibod

ken, nonĩ yedig den. Idi ã bun ereb wõ yen anĩ nigin, fatuk bagai terẽ de fen, inid ifitin.

Pita Tempel Bun Od Wogõ Yen

¹¹ Solomon nẽ Waranda dedig an, nonĩya tamo anĩ, Pita Jon ado irounẽdi di, tamo kayau ganan terẽ de fen, gududu de, idi gedin disin. ¹² Pita anĩ ile fen, idi irokenẽdin, “Israel tamo, ere nigin eneim ã terẽ yeik de? Ere nigin nemã megeir bunem be, nemã Negur aniniya bunem, tamo enei el mafiyen gen amã lo wamãglef? ¹³ Abraham, Isak, Jakop idi neid Negur, tubuda tar neid Negur im, yogon kabĩ tamo Jesus fula fiya medeĩya ifenen. Æ ã dukesiyouf nigin wenẽdig fen, Pailat ã itornẽ di, ilauf nigin kisi ino mog, ã Pailat mala bun ã nigin wa gen. ¹⁴ Æ, ã Fateul Madur tamo anĩ wag fen, tamo yukesiya tamo anĩ yaliskeneĩf nigin urokenẽgen. ¹⁵ Æ mata nẽ gariya anĩ ukesigen, anĩ ere, Negur ã laa bun tamal yalesnen. Amã enei mailen nigin wogõ mauf. ¹⁶ Jesus yana nigin momoiya bunem, Jesus yana anim, tamo enei ã kelei ken, ulegedig anĩ totol ifenem. Momoiya ã bunem isif anim, tamo enei ã ganan log mog, el fiye kelel.

¹⁷ “Turau tar, aya kelei, ã ãgenei uyu irouya geid, kelei sã nigin ago gen. ¹⁸ Anĩ ere, enei wõya sã mog, Negur profet ganan bun wogõ yen, are yogon Kristus darau yalouf bagai, anĩ Negurem agef kisi felen. ¹⁹ Anĩ nigin, wauĩ falei ge fen, Negur bun uleg, anĩ bunem ãgenei mosor isasalauf. Ago gouf, wauĩ mata wõya nẽ sain Odug bunem isi fen, ²⁰ Negur, Kristus ã nigin igirin, are Jesus sur foug. ²¹ Jesus fau de saa ilun

ibod mog, Negur ereb ereb ganan mata inouf nē sain wō youf, kulu yogon profet fateul sigoreid bun Negur wogō yen kilei. ²² Moses iron, ‘Odug āgenei Negur, profet taka aya gen, tamo kayau ā atun wō ye keneif. Ā ereb irokeneif ganan, karī gouf bagai. ²³ Taka nem profet anī to karī fiyēf, ī tamo kayau atun gai gai gudūf irailauf.’*

²⁴ “Age fiya gen, profet ganan Samuel bun gariya ino fen, isin idig, gama naa eneidi bun ereb wowā yef isin anī nigin wogō den. ²⁵ Ā profet neid gere tar, Negur āgenei tubuī tar geid bar itenēya inon, ā bar itenēya anī nē gere tar. Negur Abraham irokenen, ‘Ogon ibor bunem, tamo kayau teneub ganan bun el fediyouf.’† ²⁶ Negur yogon kabī tamo yalesne ken, āgenei sane bun tamal, ā mugu mugu ganan falei ge di, el yeif nigin, ā bun ket Jesus sur fen.”

4

Pita Jon Ado Juda Neid Uyu Irouya Meleid Bun Difaren

¹ Pita Jon ado, tamo kayau od dirokeneid mog, pris tunī, tempel lo fiya tamo neid mudur, Sadusia tamo tunī geid, idi gedin disin. ² Idi fatuk bagai waud moron, ere nigin, aposel idi tamo kayau difelneid fen, Jesus laa bun tamal mata kel fā yen anī wogō den. ³ Idi Pita Jon ado dirouneid fen, aragau nigin idi kalabus bun dinenēdi di, ile we felen. ⁴ Anī ere, od karī den idi musei momoi den, momoiya tamo faif tausen age fiya wō den.

* **3:23:** Diuteronomi 18:15, 18, 19 † **3:25:** Jenesis 22:18; 26:4

⁵ Naa taka di, nedi uyu irouya, mudur adodo, lo ifelnēdiya tamo geid, Jerusalem guru difen.

⁶ Pris neid mudur Anas an ibodon, Kaiafas, Jon, Aleksanda, pris mudur neid ibor tunī ganan idig an dibodon. ⁷ Idi Pita Jon ado guri de dirousi, atū difeid fen, to difedin, “Ere megeir bunem be, ere yana bunem enei ago gen?”

⁸ Age de di, Pita Awa Uur Fateulem aura fiyen ī, idi irokenēdin, “Tamo kayau neid uyu irouya, mudur adodo! ⁹ Amā gama, tamo ye ilolaisin bun ereb biya age mafe di, naig fe el fiyen nigin to wamāgouf are, ¹⁰ ā, Israel tamo kayau ganan geid enei keleī youf, ā Jesus Kristus Nasaret tamal aa tetek bun ukesigen, anī ere, Negur ī laa bun tamal yalesnen, ī yana bunem, tamo ā meleī bun ifaref enei el fiyen. ¹¹ Tamo are

“meein fō inoya tamo āgem sane ge fen, utorōgen,

anī gama monog tor wō yen.”*

¹² Taka bun tamo kel gei fiya to ibodok, ere nigin, ada kel gei fadauf nigin, saa farumen yana taka to tamo ifenēdin.”

¹³ Pita Jon ado skul ileyā sā, fonō tamo, are idi kelein, anī ere, idi kumī sā wogō de di, dile fen, terē den. Age de fen, idi kelein, tamo eneidim Jesus geid diyon. ¹⁴ Anī ere, tamo el difiyen anī, Pita Jon ado geid difar mog, dilen nigin, idi ereb od irōya nigin od sā. ¹⁵ Anī nigin, Juda uyu irouya neid kaunsel guru fiya anī ditor dilauf nigin, idi dirokeneīd, ditor dile di, idi dogo dogol katō difen. ¹⁶ Idi diron, “Tamo eneidi ere naig

* **4:11:** Sam 118:22

tafiyēdiyof? Idi memelik enei fire bagai dinon anī, Jerusalem dibodok idi ganan kelei, are ada wa fiya kisi feleya sā. ¹⁷ Anī ere, enei, tamo kayau bun to iyokalauf nigin, tamo eneidi Jesus yana bunem taka to wogō difiyēf nigin, ada wedereid tarouwauf bagai.”

¹⁸ Age de fen, idi baban namen diweigneīd, disi di, Jesus yana bunem to bagai wogō douf be difelnēdiyof nigin, total bagai dirokenēdin. ¹⁹ Anī ere, Pita Jon ado solo de dirokenēdin, “Negur mala bun, Negur dō fiya ban, ā dō mayeīf, are tutuk de, sā de anī, ā aug es wog. ²⁰ Ereb amā mailen, karī maun nigin, sigoramā ifōya kisi feleya sā.”

²¹ Uyu irouya idi baban kumī od difeneīd le fen, folō difeid le di, dilen. Uyu irouya idi darau ifenēdiya nigin kisi taka to dalen, ere nigin, tamo kayau ganan ereb wō yen anī nigin, Negur yana dalesen. ²² Tamo memelik dino fen, el difiyen are, yar foti wal feseya.

Momoiya Tamo Kayau Neid Kosēya

²³ Sain Pita Jon ado dalisnēdi di, idi dogo neid tamo kayau bun keku de dile fen, pris odudug mudur adodo geid, od dirokenēdin anī ganan wogō difiyēdin. ²⁴ Idi od anī karī de fen, idi aiteid tekelei dales fen, Negur kosē difiyē diron, “Odug ereb ereb ganan nē Marau, ō saa, teneub, maaī, anidi namen ereb ereb ganan unodin. ²⁵ Tamamā Dawid, ogon kabī tamo sigor bun Awa Uur Fateulem wogō won:

“ ‘Ere nigin haiden idi Odug bun seye de fen,

tamo kayau idi kiwai nē kisi are ege bagai dinof?

²⁶ Tenebur nē king idi kusīya nigin dodok difef, uyu irouya tamo guru de fen, Odug bun ado

yogon Kristus bun kiwai dinof.’†

²⁷ Momoi, Herod, Pontius Pailat idim, haiden, Israel tamo kayau geid, taun enei bun guru de fen, ogon kabī tamo fateul Jesus ō ogo ugrin ī kiwai difenen. ²⁸ Ō ogon megeir ado oroya bunem agef wō youf wo fen, tetun ufon anī kilei, idi age difen. ²⁹ Odug, gama idi dogo neid kumī od dinon anī kisi fen, amā ogon ferfer, ogon od kumī sā megeir ado wogō mauf nigin megeir wanamā. ³⁰ Imā ura ken, dagi el wo, ago fen, ogon kabī tamo fateul Jesus yana bunem memelik uris ado unodiyouf.”

³¹ Kosē de bure difel mog, idi guru difen nē modoū anī guyoyō fen. Age fe di, idi ganan Awa Uur Fateulem aura fiyeid fen, toli fedī di, kumī sā Negur nē od wogō den.

Momoiya Tamo Kayau Dogo Neid Safina Weim Dile Dogolen

³² Momoiya tamo kayau ganān waud ado kisi tekelein. Taka nem, yogon safina taka to neu mugu yen, anī ere, ereb ereb ganān idi ado are weim dile dogolen. ³³ Aposel idi megeir odug nem, Odug Jesus mata kel fā yen nigin wogō den, age dife di, Negur nē wau ifenēya odug, idi ganān bun ibodon. ³⁴ Age fe di, idi atun taka nem ereb taka to lau fen, ere nigin, teneub be fō adodo

† **4:26:** Sam 2:1, 2

anĩ na nigin sur difeid fen, moni dale dirou disi,
³⁵ aposel imeid bun dinodig, anĩ gadõ de fen, taka
 ã lau fef anĩ difenẽdig.

³⁶ Josef, Lewi ibor taka, Saipras nuyo tamal,
 aposel idi ã anĩ Banabas dedig (anĩ nẽ gariya, Wau
 Yaleyá Tamo), ³⁷ ã yogon teneub na nigin sur fe
 fen, moni yale, aposel imeid bun inon.

5

Ananias Safira Ado

¹ Tamo taka yana Ananias, aiwa Safira ado,
 nedi safina taka na nigin sur difen. ² ã, yogon
 aiwa anĩ ganan keleĩ mog, moni tunĩ yogon nigin
 irou fen, tunĩ anĩ yale iroule, aposel imeid bun
 inon.

³ Age fe di, Pita iron, “Ananias, naig fe di, Satan
 waũ bun isokose di, Awa Uur Fateul udegne ken,
 moni teneub nẽ walen anĩ tunĩ ogon nigin urouf?”

⁴ Fau na sur fiya sã mog are ogonen, na nigin
 sur wol fen, moni areg ogonek. Ere nigin õ waũ
 bun enei ago wouf nigin kisi unol? Õ tamo to
 udegnẽdil, are õ Negur udegnem.”

⁵ Ananias od enei karĩ ye fen, ã kubũ ye laaf
 yenen. Ganan od enei karĩ den, idi kumĩ tererẽ
 den. ⁶ Age fe di, tamo gaũ gaũ disi, yogon bouwa
 sile de, faali de diroule, mũ difen.

⁷ Tri aua age fiya ilele di, aiwa gober ereb wõ
 yen anĩ keleĩ sa ken, isin. ⁸ Age fe di, Pita kayau
 to fiyen, “Urokana, õ aiwã ado teneub nẽ moni de
 enei kilei walegen de?”

Kayau iron, “Ao, de enei kilei dogol.”

⁹ Age ye di, Pita kayau irokenen, “Naig fe di, ò aiwā ado wauĩ tekelei fen, Odug nē Awa Uur kisi wiyēgel? Ulef, tamo idi ogon aiwā mū difel, idi neid yebureid yer bobogē, òg idi age de faali de dirouleyōf.”

¹⁰ Agef irokenē di, kaisā bagai, Pita ye gariyan, kayau are kubū ye laa fen. Age fe di, tamo gaũ namen disi, kayau laa fel dile fen, faali de diroule, aiwa mū difen sirin mū difen. ¹¹ Sios adok, tamo kayau ganan od enei karĩ den idi geid, fatuk bagai kumĩ den.

Aposel Idi Tamo Kayau Musei El Difedin

¹² Aposel idi tamo kayau atun memelik uris ado musei dinodin. Age dife di, momoiya tamo kayau ganan Solomon nē Waranda bun guru difedig.

¹³ Tamo kayau idi nigin yeneid dalesedig, anĩ ere, idi kumĩ de fen, taka nem idi geid to bagu difen.

¹⁴ Anĩ ere, tamo kayau musei Odug nigin momoi de di, momoiya tamo kayau baba baban tobol fef iselen. ¹⁵ Aposel age difef ya anĩ kelei ken, tamo kayau dagi adodo naabur guri difedi di, fatar bun ado gogoũ bun dinenādin, are Pita ile di, yogon burig idi tunĩ bun irā di, el be fediyouf de fen, age difen. ¹⁶ Tamo kayau musei Jerusalem kalilĩ fiya taun temeideg, dogo neid dagi adodo, kaa sesenem darau difenēdin anidi guri de dirou disi di, idi ganan el difiyēdin.

Idi Aposel Darau Difenēdin

¹⁷ Age dife di, pris neid mudur ĩ, yogon katō tura tar are Sadusia tamo geid, kiyeĩ beberĩdin.

¹⁸ Idi aposel dirouneĩd fen, kalabus bun dinenēdin. ¹⁹ Anĩ ere, bō anĩ bun, Odug nē engel

kalabus fõ sukar kã feleid, gurif, mayarẽ disi fen, irokenẽdin, ²⁰ “Ulagauf, tempel bun ufareg fen, tamo kayau mata enei nẽ od ganan urokenẽdig.”

²¹ Idi irokenẽdin kilei, bonimei bagai idi tempel bun dile fen, tamo kayau ifelnẽdiya gariya dinon.

Sain pris neid mudur, yogon katõ tura tar geid disi di, idi Israel neid uyu irouya ganan neid guru fiya yana Sanhedrin dedig anĩ diroun, age de fen, idi aposel kalabus bun temeleid guri difeid dirou disiyouf nigin tamo sur difedin. ²² Anĩ ere, sain kabĩ tamo kalabus fõ bun dilen, aposel an to diledin. Anĩ nigin, idi keku de dile dirokenẽdin, ²³ “Amã kalabus fõ kotũ feleya ado lo fiya tamo bobog bun difar mog, mailedil, anĩ ere, sukar kã mafel fen, an taka nem to ibod mog mailer.” ²⁴ Od anĩ karĩ de fen, tempel lo fiya tamo neid mudur, pris odudug geid, nene de fen, enei bunem naig be fe wõ youf de fen, sii fedin.

²⁵ Age de mog, taka nem isi iron, “Ulegef! Tamo kalabus bun unenẽdigen idi tempel bun difar fen, tamo kayau difelnẽdif.” ²⁶ Age ye di, tempel lo fiya tamo neid mudur, yogon kabĩ tamo geid, dile, aposel gei difeid fen, dirou disin. Idi to sibu difiyeĩd fen, daũ difiyẽdin, ere nigin, idi tamo kayau meein tulu difiyẽdiya nigin kumĩ difiyẽdin.

²⁷ Idi aposel gei de dirousi, Israel uyu irouya neid guru fiya meleid bun difarnẽdi di, pris neid mudur idi to fiyeĩd ²⁸ iron, “Amã yana enei bunem to ufelnẽdigouf nigin, total bagai katũ mayein, anĩ ere, ã wogõ ge di, ã ufelnẽdigen anĩ Jerusalem ganan bun iyokelen, ago ge di, tamo enei nẽ naud amã bouwamã bun unogef.”

²⁹ Pita aposel ganan geid aiten dale diron, “Amã tamo aiteid dõ fiya ban, Negur ait anĩ dõ mafouf bagai. ³⁰ Jesus laa fouf nigin aa bun useginnēgen, anĩ ere, tamada tar neid Negurem Jesus laa bun tamal yalesnen. ³¹ Ĩ Negurem yalesne ken, ima biyalē neda King, neda Kel Gei Fadaya inenen, are Negurem Israel tamo kayau waud falei fe di, nedi mosor weder tu kalauf nigin age fen. ³² Amã enei mailen anĩ yaor ma wogõ mauf, Awa Uur Fateul, are Negur dõ difef anidi ifenēdin, ĩg age fef.”

³³ Idi od enei karĩ de fen, idi seye de, didenke-siyouf nigin age difen. ³⁴ Anĩ ere, Farisia tamo taka yana Gamaliel, ĩ lo ifelnēdiya tamo, tamo kayau ganan ĩ yana dalesedig, ĩ guru fiya atun ifar fen, aposel idi sain naal mayarē dinenēdiyof nigin irokenēdin. ³⁵ Age dife di, ĩ idi irokenēdin, “Israel tamo, ã tamo eneidi ereb naig wiyēdigou fenē are, ã kisi el ge waleg le fen, ago gouf. ³⁶ Kulu sain taka bun, Teudas ĩ yogo anĩ tamo odug ye fen, wõ yen, age fe di, fo handred tamo age fiya dõ difiyen, anĩ ere, ĩ dukesi di, yogon dõ fiya tar ganan firagagaũ dife, ege sa kelen. ³⁷ Tamo enei dumen, Judas Galili tamal, tamo kayau yeneid iweseya sain bun wõ ye fen, tamo kayau geif yalen, anĩ ere, ĩg dukesi di, yogon dõ fiya tar ganan firagagaũ difen. ³⁸ Anĩ nigin, enei nigin aya ã arokeneik, tamo eneidi utornēdig len dile! Idi ereb kisi difef be, ereb age difef, are tamo bun tamal ouf are, fau sa kalauf. ³⁹ Anĩ ere, enei Negur bun tamal ouf are, ã tamo eneidi katũ fiyēdiya kisi feleya sã, age fiya ban, ã aug Negur geid kusĩ gef anĩ ulogouf.”

⁴⁰ Age ye di, idi yogon od diroun. Idi aposel diweigneĩd, namen dile di, wagagã difedin, age de fen, idi baban Jesus yana bunem to wogõ douf nigin dirokeneĩd fen, ditornēdi di, dilen.

⁴¹ Aposel idi kaunsel guru fiya anĩ ditor dile fen, kulĩ den, ere nigin, Negur kisi fen, are idi Jesus yana nigin mama dalouf nigin kisi feleya. ⁴² Naa ganan, tempel bun ado fõ bun fõ bun dile, toku difelneĩd fen, biya od wogõ de, Jesus ĩ Kristus den.

6

Tamo Sewen Digirnēdin

¹ Sain anĩ bun, dõ fiya tamo kayau musei di, Juda tamo kayau Grik od wogõ dedig anidim, Juda tamo kayau Hibru od wogõ dedig anidi nauseir difiyēdin, ere nigin, idi neid kayau waab naa ganan saaf gadõ fiya bun ditornēdidig. ² Anĩ nigin, aposel tuwelf idim, dõ fiya tamo kayau ganan kuru difeid fen, diron, “Amam Negur nē od wogõya kabĩ mator ken, saaf lo fiya kabĩ malouf, are to biya. ³ Anĩ nigin, turamã tar, ã atun tamo sewen Awa Uur ado kisi biya barikã nigin yeneid walesegedig anidi ugirnēdig. Kabĩ enei amã idi bun manouf. ⁴ Age ma fen, amã, kosëya ado od wogõya kabĩ bun dogol, kabĩ total malouf.”

⁵ Od enei karĩ de fen, idi ganan yo den. Idi digirin, Stiwēn, ĩ tamo momoiya ado Awa Uur Fateul barikã, taka Filip, Prokoros, Nikanor, Timon, Pamenas, Nikolas Antiok tamal ĩ Juda neid momoiya bun falei ye fen, Kristus nē momoiya yalen. ⁶ Age dife fen, idi, tamo anidi aposel

wagedin dinenēdi di, aposel idi kosē del fen, imeid tetedin dinon.

⁷ Negur nē od iyokelen. Jerusalem an, dō fiya tamo kayau tobol fe, musei biya wowā den. Age dife di, pris musei idig momoiya anī dō difen.

Idi Stiwen Ka Difen

⁸ Stiwen ĩ, Negur nē wau ifenēya ado megeir barikā tamo, ĩ tamo kayau atun memelik uris ado odudug inodin. ⁹ Anī ere, fefeya yenen, Friman* dedig neid uub fō bun temeleid tamo, are idi Juda tamo Sairini ado Aleksandria taun temeleid ado, Silisia ado Asia provins bun temeleid anidim, Stiwen geid fefe den. ¹⁰ Anī ere, Stiwen ĩ kisi biya ado Awa Uur bunem wogō yen anī, idim wal fiyēya kisi feleya sā.

¹¹ Age fe di, idi iminēyan, tamo tunī eig de dirōf nigin waud dalen, “Stiwen ĩ Moses ado Negur nigin kono fiya od wogō ye di, karī maun.”

¹² Idi od anim, tamo kayau, uyu iroudiya tamo ado, lo ifelnēdiya tamo geid nameid dalesen. Age dife di, idi Stiwen ka dife, Juda uyu irouya tamo neid guru fiya bun diroulen. ¹³ Idi, tamo tunī idegēya od wogō douf nigin, guri de disi di, diron, “Tamo enei faimud sigor taka to ifōdig, Negur nē tempel enei nigin ado, Moses nē Lo nigin, kiwai od wogō yedig. ¹⁴ Ere nigin, amā karī mafiyē mog, ĩ iron, Jesus Nasaret tamal eneim, modoū enei narī fel fen, Moses nē tobonunā ifanadan anī falei foug yen.”

* **6:9:** Are idi Juda tamo kulu ferfer dibodon, anī ere, idi gama ferfer sā.

¹⁵ Ganan kaunsel guru fiya anī bun dibodon idi, Stiwen lo difelen, ī nawa engel nawa gen dilen.

7

Juda Uyu Irouya Neid Guru Fiya Meleid Bun Stiwen Wogō Yen

¹ Age de fen, pris neid mudur Stiwen to fiyen, “Od wogō den enei, are momoi de?”

² Stiwen solof iron, “Turau tar ado Dei geg, karī wiyag, tubuda Abraham Haran taun fau ileyā san, Mesopotamia ibod mog, fula fiya medeīya nē Negur ī bun wō yen. ³ Negur Abraham irokenen, ‘Ogon teneub ado ogon tamo kayau utorneīd fen, teneub aya afelnōf nē an ulauf.’* ”

⁴ “Anī nigin, ī Kaldia teneub itor ken, Haran ile ibodon. Dum yogon tama laa fe di, Negur ī sur fiyē di, teneub gama ubodōgef enei bun ibodon. ⁵ Negur Abraham ein teneub taka to ifenen, teneub masak bagaig taka to ifenen. Anī ere, Negur, Abraham ī dumen yogon ibor nē tubu tar geid, teneub anī afenēdiyof yen, anī ere, sain anī bun Abraham ī kesu san. ⁶ Negur Abraham eig ye irokenen, ‘Ogon ibor nē tubū tar, yaū tamo teneub taka bun dibodōf, an idi ferfer dibodōf, fo handred yar to biya difiyēdiyof. ⁷ Anī ere, aya, idi ferfer dibod ken, aruneid dalef neid teneub darau afenēf, anī dumen, idi teneub anī bun tamal diya disi, modoū enī bun aya arunau dalouf.’† ⁸ Agef fen, Negur Abraham bar itenēya nē uris, mulū anī ifenen. Age fe di, Abraham naal

* **7:3:** Jenesis 12:1 † **7:7:** Jenesis 15:13, 14

Isak wõ ye, naa eit ilele di, mulũ ifenen, dumen Isak naal Jakop wõ yen, Jakop ï tubuda tar tuwelf neid temeid ibodon.

⁹ “Tubuda tar, Josef kiyeĩ difen ken, Josef Isip neid ferfer wõ youf nigin, na nẽ sur difen. Anĩ ere, Negur ï adon, ¹⁰ agef fen, Negur Josef morõ ganan bun isennen. Negur ï, Josef Isip nẽ king Farao mala bun, kisi biya ado wau ifenẽya anĩ ifenẽ di, Farao ï, Josef Isip teneub ado yogon fõ ganan lo fiya nigin uyu irouya inenen.

¹¹ “Age fe di, Isip teneub ado Kanan teneub ganan bun, naũ odug wõ ye di, morõ odug dalen, age fe di, tubuda tar saaf fotou fiya kisi feleya san. ¹² Anĩ ere, Jakop, Isip oun saaf ado ya karĩ ye fen, tamada tar urug bagai sur fedin. ¹³ Idi baban dile di, Josef ï yogo nigin tura tar bun yaor fen, age fe di, Farao ï Josef nẽ ibor nigin kelein. ¹⁴ Anĩ dumen, Josef, tama Jakop ado yogon ibor ganan Isip dilauf nigin od sur fen, idi ganan sewenti-faif. ¹⁵ Age fe di, Jakop Isip ilen, an ï ado tubuda tar gare desin. ¹⁶ Idi neid bouweid keku de, Sikem taun guri de diroule, kulu Abraham Sikem oun, Hamor gere tar bun moni nem matmat na yalen anĩ bun mumã difen.

¹⁷ “Negur Abraham irokenen anĩ kisi falauf nigin sain dodol mog, Isip oun neda tamo kayau musei biya isoran. ¹⁸ Age dife di, king taka ï Josef nigin keleĩ sã, ï bagam Isip nẽ king wõ yen. ¹⁹ Ñ ada neda tamo kayau idegneĩd fen, darau ifenẽdin, are tubuda tar nugo fiyẽdi di, idi neid kesu momou sineid gogũ difedif anĩ, mayarẽ dirarã di, gare douf nigin age fen.

²⁰ “Sain anĩ bun, Moses wõ yen, ì Negur mala bun kesu meli bagai. Ogõ towo, tama nẽ fõ bun kulatun difen. ²¹ Sain ì mayarẽ dinenẽ di, Farao ne baraim yalen, ì yogon kesu ouf nigin yale iroulen. ²² Moses ì, Isip neid keleĩ biya adok difelnẽ di, wogõya bun ado ereb ereb age fediya nigin, tamo megeir ado wõ yen.

²³ “Moses ì yogon yar foti mog, ì Israel tura tar ki fediyouf nigin kisi fen. ²⁴ Moses ì, idi neid taka Isip tamom to biya fiyẽ mog, ilen, anĩ nigin, ì Israel tura isenne ken, aba solof Isip tamo anĩ yukesin. ²⁵ Moses kisi fen, yogon tamo kayau keleĩ youf, are Negurem idi kafĩ fiya bun tamal gei fediyouf nigin, ì itonek, anĩ ere, idi to kelein. ²⁶ We fele di, Israel tamo kusĩ de mog, Moses wõ yen. Ì, idi komo difouf nigin daũ gudũf fen, iron, ‘Are ã tutur, ere nigin ã abob darau wenẽgef?’

²⁷ “Anĩ ere, tamo ì, ne tã darau ifenen anim, Moses sur fiyẽ ira ken, iron, ‘Aim õ amã bun, uyu irouya ado es fiya tamo inenon? ²⁸ Õ nor Isip tamo ukesin gen, ayag ago unakesiyou fenẽ de?’[‡] ²⁹ Moses od enei karĩ ye fen, ì Midian teneub bun iya ilen, an ì yaũ tamo ibod ken, kesu monog uru adon.

³⁰ “Yar foti ilele di, engel taka, gerere tuan Sinai Arei non, aa balai durĩ ado an yã bale namen, Moses bun wõ yen. ³¹ Moses anĩ ile fen, terefeit yen. Ì tutuk ilouf nigin aa non iyok ile mog, ì Odug nẽ ait karĩ yen, ³² ‘Aya tubuĩ tar neid Negur, Abraham, Isak, Jakop idi neid Negur.’[§] Moses kumĩ tererẽ ye fen, lo fiya itoron.

[‡] 7:28: Eksodas 2:14 [§] 7:32: Eksodas 3:6

33 “Age fe di, Odug Moses irokenen, ‘Ogon sendel unukakã, ere nigin, modoũ õ ufaref nẽ are fateul teneub. 34 Momoi, aya neu tamo kayau Isip oun darau fatuk bagai dale mog, ailen. Aya idi neid kaïya karĩ au fen, idi kafĩ fiya bun tamal alelnẽdiyof nigin asin. Anĩ nigin, gama usi, aya sur ayõ di, Isip kel ulauf.’* ”

35 “Moses enei, idi kulu ã nigin eig de diro ken, ditoron, ‘Aim õ amã bun uyu irouya ado es fiya tamo inenon?’ De ã anĩ, Negurem idi uyu iroukenẽdiyof nigin ado kafĩ fiya bun tamal yalelnẽdiyof nigin, engel aa balai bun yã bale namen Moses mala bun wõ yen anĩ bunem sur fiyen. 36 Moses ã, tamo kayau Isip temeleid uyu iroukeneĩd fen, Isip an, Maaĩ Giriya bun ado, yar foti gerere tuan, memelik uris ado inodin. ”

37 “Moses de anim, Israel tamo kayau eig ye irokenẽdin, ‘Negur ã, ãgenei tamo kayau bun tamal, profet taka aya gen sur feneĩf.’† 38 ã, engel Sinai Arei bun wogõ fiyen anĩ ado tubuda tar geid, gerere tuan tamo kayau guru fiya atun ibod ken, mata ibodõya od ifenẽdi di, tobol fe isi, ã bun isiyof nigin od anĩ yalen. ”

39 “Anĩ ere, tubuda tar, Moses nẽ od dõ fiya ditoron. Idi Moses anĩ ditor ken, Isip kel ileya nigin waud iron. 40 Age de fen, idi Aron diro-kenen, ‘Uyu diroukanamãf nigin, waitou uneye kanamãdiyof. Ere nigin, Moses enei, Isip tamal gei famã irosin ã bun ereb wõ yen are, amã keleĩ sã.’‡ 41 Sain anĩ bun, idi idegẽya waitou ”

* 7:34: Eksodas 3:5, 7, 8, 10 † 7:37: Diuteronomi 18:15

‡ 7:40: Eksodas 32:1

bulmakau lubu dinon. Idi anī bun sesewi dife fen, idi imedim dinon anī nigin seli dabiyou fenē, tar odug dinon. ⁴² Anī nigin, Negur idi itornēdi di, saa ilun nē megeir anī seli dabiyouf nigin folō feid len. Are profet neid buk bun itotoya yenek kilei:

“ ‘O Israel tamo kayau, ã gerere tuan oun, foti yar bun, sesewi fiya ado ofa wanagen, anī ere, ã aya yanau to seli wabigen.

⁴³ ã idegēya waitou Molek nē salafat unog fen, ãgenei waitou Refan nē barisa yana wale-segen, are idegēya waitou ã selid wabidigouf nigin unodigen.

Anī nigin, aya ã ãgenei teneub bun tamal alelnei ken, oun Babilon kantri ubodōgouf nigin sur ayeĩf. ’§

⁴⁴ “Sain neda tubuda tar gerere tuan dibodon, idi Negur nē salafat adon, salafat anī bun Negur ibod ken, od wogō yedig. Salafat are, Negur Moses irokenē di, Negur Moses ifelnen kilei bagai dinon. ⁴⁵ Neda tubuda tar, salafat dalen anī dirou fen, Josuam uyu irou di, Negur tubuda tar meleid bun haiden irud iraile, diya di, teneub anī dalen an salafat dirou disin. Salafat anī, teneub anī bun ibodon, ile Dawid nē sain bun. ⁴⁶ Negur Dawid isennē el fe di, Dawid wau el fen, anī Jakop nē Negur ibodōf nē modoū, inim inouf nigin Negur irokenen. ⁴⁷ Anī ere, Dawid naal Solomon im, Negur nē fō inon.

⁴⁸ “Anī ere, Negur Ilun Bagai ĩ, tamo imedim fō dinof anī bun to ibodōdig, are profet eig ye irok kilei:

§ 7:43: Amos 5:25-27

49 “ ‘Odug irok, saa are neu king nē sia,
teneub are yeu inoya nē sawa.

Ã ere fõ anĩ aya unokanagauf?

Neu si inoya nē modoũ nain ibodok?

50 Aya imaum eneidi ganan to anodin de?)*

51 “Ã uleĩ teregein yediya tamo, ã wauĩ ado wedereĩ fitok yukeledin! Ã ãgenei tubuĩ tar gen, faimud Awa Uur Fateul dudum wiyēgedig!

52 Tubuĩ tar profet taka to darau difenen de? Tubuĩ tar idi, Madur Tamo anĩ fau isiyouf de fen, wogõ den tamo anidig didenkesin. Are gama Madur Tamo anĩ kiwai wenēg fen, ukesigen. 53 Ã, lo engel bunem kabĩ bun difenen anĩ walegen, anĩ ere, ã anĩ to dõ gen.”

Stiwen Meein Tulu Difiyen

54 Idi enei karĩ de fen, idi nameid fatuk bagai sane fen, ĩ nigin goboreid kikokõ yedin. 55 Anĩ ere, Stiwen, Awa Uur Fateulem barikã, saa ilun mala ira ken, Negur nē fula fiya medeĩya ado Negur ima biya melē Jesus ifar mog, ilen. 56 Agef fen, Stiwen iron, “Ulegef, aya saa kã fele di, Tamo Naal Negur ima biyalē ifar mog, ailef.”

57 Age ye di, idi aiteid odugem kakaĩ de, imedim wedereid fitok du ken, idi adok ĩ garan gududu den. 58 Idi taun tamal Stiwen dĩ de dirou dile, serē meein tulu difiyen. Age dife mog, Stiwen bou bun od dun idi, nedi kolos dinukaka ken, tamo gaũ yana Sol ĩ ye gariyan gõ difen.

59 Idi Stiwen meein tulu difiyē mog, Stiwen kosē yen, “Odug Jesus, neu uur wale.” 60 Age ye fen, ĩ

* 7:50: Asaia 66:1, 2

ibor itenana ken, wade iweig iron, “Oduḡ, mosor age difef enei mala solo to wenēdiyof.” Ĩ agef irokkel fen, laa fen.

8

¹ Sol ĩ Stiwen dukesiyof nigin, idi geid waud tekelein.

Sol Sios Darau Ifenen

Naa anĩ bun, darau oduḡ Jerusalem sios bun wõ yen. Age fe di, momoiya tamo kayau ganan firagagaũ dife, Judia ado Samaria distrik bun dilelen, aposel dogol Jerusalem difaren. ² Negur oroya dõ difedig tamo tunĩ Stiwen mũ difel fen, ĩ nigin waud fatuk gudũf, inã loguren. ³ Anĩ ere, Sol gariya ino, sios daũ fof nigin age fen. Ĩ fõ bun fõ bun ile fen, momoiya tamo kayau geif fen, kalabus bun inenēdin.

Filip Samaria Ilen

⁴ Momoiya tamo kayau firagagaũ de dilelen, idi dilelen nē an biya od wogõ den. ⁵ Filip Samaria neid taun taka bun ile fen, an Kristus nigin wogõ yen. ⁶ Tamo kayau, Filip nē od karĩ den ado ĩ memelik inodin anĩ dile fen, idi ganan Filip wogõ yen anĩ bun kisi fatuk dino, karĩ difiyen. ⁷ Tamo kayau musei bun tamal, kaa sesen kakaĩ de ulolõ deis diyalelen, ilolaisin musei ado yeid fefu fedin musei el fedin. ⁸ Anĩ nigin, taun anĩ bun kulĩya oduḡ adon.

Idegēya Waitou Kosē Fiyēdig Tamo Simon

⁹ Tamo taka yana Simon dedig an ibodon, ĩ taun anĩ bun idegēya kosē inodidig, anĩ bunem

Samaria tamo kayau ganan terē fiyēdidig. Ī yogo nigin anī, aya tamo odug yedig. ¹⁰ Age fe di, tamo kayau yeneid adodo, yeneid sāsā geid ganan, ĩ bun kisi fatuk dino karī difiye ken, diron, “Tamo enei, Negur nē megeir, Megeir Odug dedig anī.” ¹¹ Idi ĩ bun kisi fatuk dino karī difiyen, ere nigin, ĩ sain meluk idegēya kosē bunem terē fiyēdidig. ¹² Anī ere, sain Filip Negur nē tano ado Jesus Kristus yana nigin biya od wogō ye di, idi in od momoi den, age dife di, idi naan igunēdin, tamo ado kayau geid. ¹³ Simon ĩg momoi ye di, naan igunen. Agef fen, Filip nain be ilef are, ĩ dō felef iyo ken, memelik uris ado odudug wō yedin anī ileid fen, terē yen.

¹⁴ Aposel Jerusalem dibodon idi, Samaria tamo kayau, Negur nē od mogo dalen anī karī de fen, idi, Pita Jon ado, idi gedin sur difedin. ¹⁵ Idi an wō de fen, Samaria tamo kayau Awa Uur Fateul dalouf nigin kosē den, ¹⁶ ere nigin, Awa Uur Fateul idi taka bun fau isiya san, idi Odug Jesus yana bunem naan igunēdin dogol. ¹⁷ Age dife fen, Pita Jon ado, imeid idi tetedin dino di, idi Awa Uur Fateul dalen.

¹⁸ Aposel imeid tamo kayau tetedin dino di, tamo kayau Awa Uur ifenēdin, Simon anī ile fen, aposel moni ifenēdiyof nigin agef fen, ¹⁹ iron, “Ayag megeir enei wanage di, taka teten imau ano di, Awa Uur Fateul yalouf.”

²⁰ Age ye di, Pita ĩ irokenen, “Ogon moni ō ado inanakalauf, ere nigin, ō Negur nē ege luwa, Awa Uur Fateul moni nem na yaleya kisi feleya wol.

²¹ Ō amā nemā kabī bun, amā geid katō tekelei sã,

nemã kabĩ taka to walef, ere nigin, Negur mala bun waũ tutuk sã. ²² Ani nigin, sane enei nigin waũ falei wo fen, Odug bun kosẽ wo. Õ waũ bun kisi agef yenek anĩ nigin Odug weder tu kalauf be. ²³ Ere nigin, õ waũ bun dirikeĩ bagai fen, mosorem ironok anĩ ailef.”

²⁴ Age ye di, Simon solof iron, “Ereb ã wogõ gel anĩ, aya bun to wõ youf nigin, Odug kosẽ wiyêg.”

²⁵ Pita Jon ado, Odug nẽ od kurõ difeis fen, wogõ difiyẽdin, age difel fen, idi Jerusalem keku de, naab luwen Samaria fonõ musei bun biya od wogõ de dilen.

Filip Itiopia Tamo Ado

²⁶ Odug nẽ engel Filip irokenen, “Fã wo fen, õ saut melem naab gerere tuan ibodok an ule, naab are Jerusalemem isil, Gasa taun wõ yen.” ²⁷ Anĩ nigin, Filip fã ye fen, ilen, luwen Itiopia tamo faat korõ feleya anĩ ã ket ile mog, fotou fiyen, tamo are Itiopia nẽ kuin Kandasi nẽ safina ganan lo fiya tamo, yana odug ado. Ì Negur yana yalesauf nigin Jerusalem ilen, ²⁸ ã karis bun ibod ken, kel yogon fonõ naab yale ile fen, profet Asaia nẽ buk iwesef ilen. ²⁹ Awa Uur Filip irokenen, “Karis anĩ garan ule fen, non ufar.”

³⁰ Age ye di, Filip karis anĩ garan gududu ye isel, tamo anĩ profet Asaia nẽ buk iwes mog, karĩ ye fen, to fiyen, “Õ uwesef anĩ nẽ gariya keleĩ de?”

³¹ Ì iron, “Tamo takam to faded fiyauf are, naig fe di, aya keleĩ youf?” Anĩ nigin, ã Filip isel, urom karis bun dibodõf nigin irokenen.

³² Faat korõ feleya tamo are, Negur nẽ Itotoya bun yenek enei iwesen:

“Ī sipsip dukesiyouf nigin dirou dilen gen dirou dilen,
 ĩ, sipsip momou siwi gudũ fiya tamo wagen dē yeledig gen,
 od taka to wogō yen.

³³ Ī lai difiye ken, ĩ to tutuk es difiyen.
 Taka nem yogon ibor nē tubu tar nigin to wogō youf,
 ere nigin, yogon mata tenebur ein dalelen.”*

³⁴ Faat korō feleya tamo Filip to fiyen, “Profet ai nigin enei wogō yef anĩ urokana, ĩ yogo nigin de, tamo taka nigin?” ³⁵ Age ye di, Filip Negur nē Itotoya enei bun gariya ino fen, Jesus nigin biya od wogō fiyen.

³⁶ Idi naab diyok dile fen, naan taka bun disi fen, faat korō feleya tamo iron, “Ulef, naan yeir, erem anĩ aya naan igunauf nigin katũ fiyaf?”†
³⁸ Age ye fen, ĩ karis irou dē yalauf nigin irokenen. Age fe di, ĩ Filip ado kututũ deis, naanũ disil fen, Filipem naan igunen. ³⁹ Sain idi naanũ tamal disele di, Odug nē Awa Uur Filip yale irou ilen, age fe di, faat korō feleya tamo Filip baban to ilen, anĩ ere, ĩ kulīya odug ado naab iyok ilen. ⁴⁰ Anĩ ere, Filip Asdot taun wō ye, naab iyok ile fen, taun ganan bun biya od wogō yef ile, Sisaria taun wō yen.

* **8:33:** Asaia 53:7, 8 † **8:36:** Itotoya dum ditoton tunĩ eig ye irok: fiyaf?” ³⁷ Age ye di, Filip ĩ irokenen, “Ō waũ adok momoi youf are, ō naan agunōf.” Faat korō feleya tamo solof iron, “Aya momoi auf, Jesus Kristus ĩ Negur Naal.”

9

Sol Wau Falei Yen
(*Aposel 22:6-16; 26:12-18*)

¹ Sain anī bun, Sol ī fau fau Odug nē dō fiya tar idenkesiya nigin wau ifokel fen, kumī ifenēdif isin. Anī nigin, ī pris neid mudur garan ile fen, ² Damaskus taun oun Juda neid uub fō fō bun pas itotkenēdiyof nigin irokenen, are ī an Odug nē naab dō difef anidi, tamo be kayau be, taka fotou fiyēf are, ifokel yale, Jerusalem irou ilauf nigin age fen. ³ Sol ī ile Damaskus wō you fenē mog, kaisā bagai, fula fiya taka saa ilun tamal, ī bun fulaf irailen. ⁴ Age fe di, ī tenebur kubū ye isil fen, ait taka wogō fiyē mog, karī yen, “Sol, Sol, ere nigin ō aya daig wiyaf?”

⁵ Age ye di, Sol to fen, “Odug, ō aim?”

Ī iron, “Aya Jesus, ō daig wiyaf anim. ⁶ Fā wale fen, taun ule, an ō ereb ago wouf nigin irokonōf.”

⁷ Tamo tunī Sol geid dilen idi, an terefeit de mā, mutū difaren. Idi ait karī den, anī ere, aib taka to dilen. ⁸ Sol tenebur tamal fā yale, mala birikā felen, anī ere, ī ereb taka ileyā kisi feleya san. Anī nigin, idi ima gim de, Damaskus diroulen. ⁹ Ī naa towo lo fiya kisi feleya san, agef fen, saaf ado naaneg to yon.

¹⁰ Damaskus an, dō fiya tamo taka yana Ananias ibodon. Ī mala seleulā kurā fen sain, Odug ī irokenen, “Ananias!” fiyē di,

ī iron, “Odug, aya yeir.”

¹¹ Odug Ananias irokenen, “Fā wale, naab yana Naab Madur dedig an, Judas nē fō bun ule fen, tamo taka Tasus tamal, yana Sol nigin to wouf. Ī

kosē yef ibodok. ¹² Ī mala seleulã kurãf fen, tamo taka yana Ananias isi, baban mala lo foug nigin ima teten ino mog, ilen.”

¹³ Ananias solof iron, “Odug, aya tamo enĩ nē od, Jerusalem oun ogon tamo kayau fateul daig fiyēdin, are museim mogo dirokana di, karĩ aun.

¹⁴ Ī, tamo kayau ganan õ yana seli dabidig anidi, kafĩ fiya bun inenēdiyof nigin, pris odudug bun tamal megeir yale fen, ein isin.”

¹⁵ Anĩ ere, Odug Ananias irokenen, “Õ ulauf, tamo enei are, neu yanau, haiden, dogo neid king ado, Israel tamo kayau bun irou ilauf nigin agirnen. ¹⁶ Ī aya yanau nigin darau naig be fiya yalouf are, fau aya yug afelnēf.”

¹⁷ Age ye di, Ananias fõ anĩ bun ilen, aaben ile fen, ima Sol teten ino fen, iron, “Turau Sol, Odug Jesus õ ein usi mog, naabur õ bun wõ yen ĩ, õ baban malã kelē wol fen, Awa Uur Fateul aura yõf nigin sur fiyal.” ¹⁸ Kaisã bagai, Sol mala bun tamal, ereb gau genĩ gen anĩ kuku ralaisin, age fe di, ĩ baban mala kelē yelen. Ī fã yale di, naan igunen. ¹⁹ Age fel fen, saaf yõ di, ĩ bouwa baban totol kel yalen.

Sol Ī Damaskus Ado Jerusalem An Biya Od Wogõ Yen

Sol ĩ, Damaskus an, naa tunĩ dõ fiya tar geid dibodon. ²⁰ Ī kaisã bagai gariya ino, Juda neid uub fõ fõ bun od wogõ ye iron, Jesus ĩ Negur Naal yen. ²¹ Idi ganan ĩ karĩ difiyen idi terē de fen, to difen, “Im anĩ, Jerusalem oun Jesus yana diweignēdig tamo kayau tadũ fedin anĩ sã de? Im anĩ, tamo

kayau ifofã, pris odudug gedin irou ilauf nigin isin anĩ sã de?” ²² Anĩ ere, Sol nẽ od wogõya totolef ilen, agef fen, Jesus anĩ Kristus ye yaor fe, wogõ ye di, Juda tamo idi Damaskus dibodon anidi, yogon od solo fiyẽya kisi feleya sã.

²³ Naa musei ilele di, Juda tamo idi, Sol yukesiya nigin kisi katõ difen, ²⁴ anĩ ere, Sol idi kisi dinon are kelein. Idi Sol dukesiyouf nigin, naa ganan bõ ado gaa ado, taun nẽ kau bobog bun ololo difiyen. ²⁵ Anĩ ere, bõ taka bun, in dõ fiya tar ã dale, karam bun dife fen, kau kurenem folo folõ dife di, tenebur isilen.

²⁶ Sain Sol Jerusalem ile fen, dõ fiya tar geid weim bagu difouf nigin age fen. Anĩ ere, idi Sol ã dõ fiya tamo taka wõ yen anĩ to momoi de fen, ganan ã nigin kumĩ den. ²⁷ Anĩ ere, Banabas ã Sol yale, aposel gedin iroule fen, Sol ã naab luwen Odug ile di, ã wogõ fiyen ado, Sol Damaskus oun, kumĩ sã Jesus yana bunem wogõ yen anĩ, aposel faded fedin. ²⁸ Anĩ nigin, Sol idi weim dibod ken, Jerusalem oun karika bagai iyo ken, Odug yana bunem, kumĩ sã biya od wogõ yef iyon. ²⁹ ã Juda tamo Grik od wogõ dedig anidi geid, od wogõ de fefe den, ani ere, idi ã dukesiyouf nigin age difen. ³⁰ Kabĩ tura tar enei kelei ken, idi ã dale, Sisaria taun dirou dilen, anenem Tasmus taun sur de dirã di, ilen.

³¹ Anĩ nigin, sios an Judia, Galili ado Samaria teneub ganan bun, idi wau inosiya sain biya ado fen, megeir ifenẽdin. Idi Awa Uur Fateul nem waud yalese di, Odug nigin aniniya ado dibodok dile di, momoiya tamo kayau musei len.

Ainias Dokas Ado

³² Pita ã modouã ganan iyokelen, agef fen, ã Lida tauneg Negur nẽ tamo kayau ki fediyouf nigin ilen. ³³ Pita, an tamo taka yana Ainias bouwa ilolaisin, ã yar eit fataren yenẽyoi yedig fotou fiyen. ³⁴ Pita Ainias irokenen, “Ainias, Jesus Kristus õ el yok. Fã wale fen, ogon bedu madur wo.” Kaisã bagai, Ainias fã yalen. ³⁵ Tamo kayau, Lida taun ado Saron fonõ dibodon idi ganan ã dile fen, waud falei ye, Odug nigin momoi den.

³⁶ Jopa an, dõ fiya kayau taka, yana Tabita (anã Grik od bun Dokas dedig) ibodon. ã faimud tobonunã biya inodidig ado maleg isennẽdidig. ³⁷ Sain anã bun, Tabita dagi yale fen, laa fen. ã laa fe di, yogon bouwa buru naan digune kel, fõ aab ilun dinenẽ di, yenen. ³⁸ Lida taun are Jopa taun non. Anã nigin, dõ fiya tar, Pita Lida ibodok yeya karã de fen, tamo uru sur dife di, ã gein dile, totol bagai dirokenen, “Kaisã bagai talauf!”

³⁹ Anã nigin, Pita idi geid dile, an ulõ yesi di, idi Pita fõ aab ilun dale dirou diselen. Kayau waab ganan an Pita salili difiye ken, idi inã dale fen, Dokas ã fau matan ibod ken, kolos ado saket iwadin anã ganan difelnen.

⁴⁰ Anã ere, Pita idi ganan mayarẽ sur feid fen, ã ibor bobou fe kosẽ yen. Agef fen, ã falei yel, kayau nẽ bouwa buru irokenen, “Tabita, fã wale.” Kayau ã mala birikã feid, Pita ile fen, fã yale ibodon. ⁴¹ Age fe di, Pita kayau ima irou yalesnẽ di, ã fã ye ifaren. Age fel fen, Pita, momoiya tamo kayau ado kayau waab geid iweigneĩd fen, Dokas ã mata kel fã yel anã ifelnẽdin. ⁴² Pita enei age fen

are, Jopa taun ganan od iyokelen, age fe di, tamo kayau musei Odug nigin momoi den. ⁴³ Pita Jopa an, gaar gabar el fiya tamo yana Simon dedig ã ado, naa musei dibodon.

10

Konelius Pita Bun Od Sur Fen

¹ Sisaria taun oun, tamo taka yana Konelius ibodon, ã wan handred kusĩ tamo neid orowa taka, ‘Itali kusĩ tamo mala’ dedig anĩ bun tamal.

² ã Rom tamal, Juda tamo sã, anĩ ere, Negur yana yalesedig, agef fen, ã yogon ibor adok geid, Negur nigin anini dedig. ã Juda maleg tamo musei isennēdidig, takag, ã toku Negur kosē fiyēdig.

³ Naa taka bun tri kilok aragau age fiya, Konelius ã mala seleulã kurãf fen, ã yaor bagai ilen, Negur nē engel isi fen, irokenen, “Konelius!”

⁴ Konelius kumĩ ado lo fiyekel fen, ã to fen, “Odug, ere?”

Engel ã irokenen, “Ogon kosē ado wau sã maleg tamo bun agodig are, Negur wagen sesewi fiya gen ise le di, Negur wau kulĩ yen. ⁵ Gama tamo tunĩ Jopa taun sur wodi di, dile, tamo taka yana Simon, Pita dedig dirou disiyouf. ⁶ ã gaar gabar el fiya tamo Simon ado dibodok, Simon nē fō are maaĩ yerin ibodok.”

⁷ Engel Konelius od wogō fiyekel fen, ã itornē di, Konelius yogon kabĩ tamo uru ado kusĩ tamo taka iweignēdin, kusĩ tamo are Negur yana yalesedig ado Konelius aruna daledig anidi taka. ⁸ Konelius ã, ereb wō yen anĩ ganan irokeneĩd le fen, Jopa taun sur fedin.

Pita Mala Seleulã Kurãf Fen, Ilen

⁹ Naa anĩ ile di, idi naab diyok dile, Jopa taun kelẽ difiyẽ mog, Pita kosẽ youf nigin, fõ sokoron iselen, are gaa atun age fiya. ¹⁰ Pita ã naũ fe di, ereb taka yõya nigin oron. Saaf dodok dife mog, ã mulã fe di, yen mog, mala seleulã kurã fen. ¹¹ Ì, saa kã fele di, anenem ereb taka gabar odug gen, iri aiwa adodo kaleya bun irou fen, tenebur folõ fele di, isil mog, ilen. ¹² Anĩ namen, gaar fire fire yeid imeid adodo, gaar luwedim diyõdig ado, ninã ilun temeleid dibodon. ¹³ Anĩ ait taka Pita irokenen, “Pita, fã wale, udenkeis fen, wõ.”

¹⁴ Anĩ ere, Pita iron, “Odug, sã bagai! Aya sesen amuyẽ adodo yõya nigin katũ difaman taka to bagai õdig.”

¹⁵ Ait anĩ baban Pita wogõ fiyen, “Ereb taka Negur ã amuyẽ sã inon anĩ, to amuyẽ ado wouf.”

¹⁶ Agef towo fe fen, kaisã bagai gabar kel yale, saa ilun irou iselen.

¹⁷ Pita mala seleulã kurãf fen, ilen anĩ nẽ gariya nigin, nene ye kisif mog, Konelius tamo sur fedin idi, Simon nẽ fõ nain be ifaref anĩ to dife kelei ken, dile, fõ bobogẽ difaren. ¹⁸ Idi diweig fen, Simon, yana taka Pita dedig an ibodok be anĩ to difen.

¹⁹ Pita ã mala seleulã kurãf fen, ilen anĩ nigin fau kisif mog, Awa Uur ã irokenen, “Simon, tamo towo õ dimirnok. ²⁰ Ani nigin, fã wale, tenebur kutũ weis usil. Idi geid ileya nigin to utor, ere nigin, ayam idi sur afedin.”

²¹ Pita kutũ yeis isil fen, idi irokenẽdin, “Aya anĩ umirnagef. Anĩ ã ere nigin usigel?”

²² Idi diron, “Amã Konelius kusĩ tamo neid orowa takam sur famã di, masil. Ì madur tamo,

Negur nigin anini yedig. Juda tamo kayau ganan, ĩ tamo biya difiyēdig. Engel fateul, õ Konelius nē fõ bun ule fen, õ urõf anĩ Konelius karĩ youf nigin ĩ irokenen.” ²³ Age de di, Pita, idi bõ anĩ bun an denēf nigin, aabē geif iroulen.

Pita Konelius Nē Fõ Bun Ilen

We fele di, Pita ĩ fã yale, tamo anidi weim dilen. Jopa taun temeleid kabĩ tura tar tunĩg, Pita geid weim dilen. ²⁴ Naa anĩ ile di, Pita Sisaria taun wõ yen. Konelius idi tari feid fen, ĩ yogon sirag tar ado mou tar melsã difaref anidi geid iweig laisi difaren. ²⁵ Pita Konelius nē fõ aaben isour iroule di, Konelius ĩ tarabã fiye ken, ĩ yogo lai feis, ye gariyan bobou fen. ²⁶ Anĩ ere, Pita ĩ yalesne ken, iron, “Ufar, ayag tamo maug.”

²⁷ Pita Konelius aaben wogõ fiyek dile fen, tamo kayau musei guru difen anĩ ile din. ²⁸ Pita idi irokenēdin, “Ã aug keleĩ bagai, Juda tamo taka, haiden tamo taka ado nigal difouf be, ĩ ki fiyēf, are lo wal fiya. Anĩ ere, aya, tamo taka sane be, amuyē ado be, to age auf nigin, Negur aya mogo ifelnan. ²⁹ Anĩ nigin, aya uweignag fen, tamo sur wedigen sain, aya wau uruya sã asil. Anĩ nigin, aya to ayeik, ere nigin ã uweignagen?”

³⁰ Konelius iron, “Naa fo mogo ilelen, sain anĩ bun, aya neu fõ bun sain eig fe mog, tri kilok aragau kosē aun. Kaisã bagai, tamo taka kolos medeĩya ado, wageun ifar fen, ³¹ iron, ‘Konelius, Negur, ogon kosēya karĩ yen ado, maleg bun ogon wau sã ifenēya anĩ karĩ yelen. ³² Anĩ nigin, oun Jopa taun, tamo Simon, yana taka Pita dedig gein, tamo sur wo di, idi Pita õ bun isiyouf nigin

dirokenēf. Ī gaar gabar el fiya tamo Simon nē fō maañ yerin ifaref an ibodok.’ ³³ Anñ nigin, aya kaisã bagai õ bun tamo sur afedin, õ usil are de agol. Odug, urokanamãf nigin irokonon anñ ganan karñ mauf nigin, amã ganan Negur mala bun gama yeir.”

³⁴ Age ye di, Pita iron, “Aya gama momoi bagai keleĩ, are Negur ĩ taka nigin dogol to wau yenēdig, ³⁵ anñ ere, teneub ganan bun, tamo taka ĩ Negur nigin anini ye fen, tobonunã biya age fedig are, Negur ĩ nigin wau yenek. ³⁶ Israel tamo kayau bun, Negur od sur fen anñ ã keleĩ, biya od eig ye wogõ yen, Jesus Kristus, ĩ ganan neid Odug, ĩ bunem maur gudũ fiya wõ yen. ³⁷ ã keleĩ, Jon naan igunēdiya nigin od wogõ yele di, Galili distrik oun gariya ino fen, Judia distrik ganan bun ereb wõ yen anñ. ³⁸ ã keleĩ, Negur, Jesus Nasaret tamal bun, Awa Uur Fateul ado megeir fi fele di, Jesus iyo ken, tobonunã biya agef fen, Satan nē megeir farumen dibodok anidi ganan el fiyēdin, ere nigin, Negur ĩ ado ibodon.

³⁹ “Amã, Jerusalem ado Juda neid teneub bun, ereb Jesus age fen anñ ganan malamã mailen. Idi ĩ aa tetek bun dũ di, laa fen. ⁴⁰ Anñ ere, Negur ĩ naa towo ilele di, laa bun tamal ĩ turĩ fiyē di, tamo kayau dilouf nigin age fen. ⁴¹ Anñ ere, tamo kayau ganan ĩ dilouf nigin to age fen, Negur mogo igirnēdin anidim dogol dilouf nigin age fen, are amam Jesus laa bun tamal mata kel fã ye fen, weim saaf ado naan mon anim. ⁴² Ī, amã tamo kayau biya od wogõ mafiyeĩd fen, Jesus ĩ mata nē ado laa nē es fiya tamo ĩ Negurem igirnen

anĩ, kurõ mafesiyouf nigin irokanaman. ⁴³ Profet ganan ã nigin kurõ difeis wogõ den, are taka ã Jesus nigin momoi youf are, Jesus yana bunem yogon mosor nigin weder tu kalauf.”

⁴⁴ Pita ã fau od enei wogõ ye mog, Awa Uur Fateul od karĩ den anidi ganan bun isin. ⁴⁵ Juda momoiya tamo mulũ bun temeleid Pita geid disin idi, Negurem Awa Uur Fateul wau sã haiden buneg fi fele di, dile fen, terefeit den. ⁴⁶ Ere nigin, haiden idi od fire fire bun wogõ de, Negur yana dales mog, karĩ den.

Age dife di, Pita iron, ⁴⁷ “Taka nem, tamo kayau eneidi naan igunēdiya nigin katũ fediyouf de? Idi amã Awa Uur Fateul malen age fiya bagai dalel.”

⁴⁸ Anĩ nigin, Pita, idi Jesus yana bunem naan digunēdiyof nigin irokenēdin. Age fe di, Pita idi geid naa tunĩ dibodõf nigin idi Pita dirokenen.

11

Pita Age Fen Anĩ Faded Fiyēdin

¹ Aposel ado, momoiya tamo kayau Judia distrik ganan bun dibodon anidi, haiden idig Negur nē od dalen yeya anĩ karĩ den. ² Sain Pita Jerusalem ise le di, Juda momoiya tamo mulũ bun temeleid kekeir od diroken ken, ³ diron, “Õ haiden mulũ to dilen neid fõ bun ule fen, weim saaf wõgen.”

⁴ Age de di, Pita gariya ino, ereb ereb ganan wõ yen anĩ dir fe faded fiyēdin, ⁵ “Aya Jopa taun abod ken, kosē au mog, aya mulam malau gelele fe, malau seleulã kurãf fen, ailen. Aya ereb taka gabar odug gen, iri aiwa adodo kaleya bun irou

fen, saa ilun tamal, aya abodon nē an folō fele di, isil mog, ailen. ⁶ Aya anī fele afe fen, tenebur tamal gaar fire fire yeid imeid adodo, gaar kuī, gaar luwedim diyōdig ado, ninā ilun temeleid ailedin. ⁷ Agef fen, ait taka karī au mog, irokanan, ‘Pita, fã wale, udenkeis fen, wõ.’

⁸ “Anī ere, aya aron, ‘Odug, sã bagai! Aya sesen amuyē adodo yōya nigin katū difaman taka to bagai õ ailen.’

⁹ “Ait anī baban saa ilunem wogō yen, ‘Ereb taka Negur ī amuyē sã inon anī, to amuyē ado wouf.’ ¹⁰ Agef towo fe fen, anī ganam baban kel dīf, saa ilun irou iselen.

¹¹ “Sain anī bun bagai, tamo towo aya gein Sisariam sur difedin idi, fõ aya abodōdig nē an wõ den. ¹² Awa Uur aya idi weim ileyā to atorōf nigin irokanan. Kabī turau tar sigis eneidig, aya weim mele, tamo anī nē fõ namen melen. ¹³ Age mafe di, ī engel taka naig be fe fen, yogon fõ bun wõ ye fen, eig ye irokenen, ‘Jopa taun oun, Simon yana taka Pita dedig gein tamo sur woid. ¹⁴ Õ ado ogon ibor tar ganam kel gei yeīf nigin, ī od õ gein irou isiyouf,’ ye di, ilen anī irokanaman.

¹⁵ “Aya od gariya ano, wogō au mog, Awa Uur Fateul uruwa bun ada bun isin gen, idi buneg agef isin. ¹⁶ Age fe di, aya Odug eig ye iron anī, wederou fokō yen, ‘Jon ī naanem igunēdin, anī ere, ã Awa Uur Fateulem iguneīf.’ ¹⁷ Anī nigin, ada Odug Jesus Kristus nigin momoi tau di, Negur wau sã ege luwa ifanadan anī, idig ifenēdin anī youf are, aya ai nigin Negur naabura gudū afiyēf?”

¹⁸ Idi od enei karĩ de fen, idi kekeir od ditor ken, Negur yana dales diron, “Age fiyauf are, Negur ã haiden idig waud falei de fen, mata bun dilauf anĩ ifenēdin.”

Sios Oun Antiok Taun

¹⁹ Stiwen dukesin sain bun, kafĩ fiya wõ ye di, momoiya tamo kayau firagagaũ dife fen, tunĩ Fonisia distrik, Saipras nuyo ado, Antiok taun dile fen, Juda tamo kayau bun dogol biya od wogõ difiyēdin. ²⁰ Anĩ ere, idi tunĩ Saipras nuyo ado Sairini taun temeleid, Antiok taun dile fen, Grik tamo kayau buneg wogõ de fen, Odug Jesus nigin biya od dirokenēdin. ²¹ Odug nē megeir idi adon, age fe di, tamo kayau musei momoi de fen, Odug bun falei den.

²² Od enei, Jerusalem taun oun sios bun iyokele di, idi Banabas Antiok taun sur difiyen. ²³ Banabas an wõ ye, Negur wau ifenēdin anĩ ilen, ã kulĩ ye fen, idi waud adok Odug bun momoi dibodõf nigin ganan waud yalesen. ²⁴ Banabas ã tamo biya, Awa Uur Fateul ado momoiya barikã. Tamo kayau musei Odug bun geif iroulen.

²⁵ Age dife di, Banabas Sol imirnēf nigin Tasus ilen. ²⁶ Banabas Sol fotou fiye ken, Sol Antiok taun irou isin. Agef fen, Banabas Sol ado yar tekelei adok, sios geid dibod ken, tamo kayau musei difelnēdin. Antiok an, dõ fiya tar anidi bun yana mata dun, are Kristen den.

²⁷ Sain anĩ bun, profet tunĩ Jerusalem anenem Antiok disin. ²⁸ Idi neid taka, yana Agabus fã ye fen, Awa Uur bunem profet od wogõ yen, kadir odug Rom teneub ganan bun iyokalauf yen.

(Sisa* Klodius nē sain bun, kadir enei wō yen.)
²⁹ Dō fiya tar, idi mugu mugu, dogo neid megeir bunem, momoiya tamo kayau Judia distrik bun dibodon anidi disennēdiyof nigin, kisi difon.
³⁰ Idi enei age de fen, moni wau sã Banabas Sol ado imeid bun dino, sios nē uyu irouya anidi bun sur difen.

12

Pita Kalabus Bun Tamal Yalisnen

¹ Sain anī bun, King Herod sios bun temeleid tunī kafī fiya ifenēdiyof nigin, gei fedin. ² Ī irō di, Jon tura Jems dimig nem dukesin. ³ Herod ĩ Jems laa fe di, Juda tamo kayau waud al fen anī ile fen, ĩ Pitag dalouf nigin ari fedin. Enei are, Bret Yis Sã Sifa sain bun wō yen. ⁴ Idi Pita dale di, ĩ kalabus bun inenen, ĩ kusī tamo mala aiwa adodo, mala mugu mugu kusī tamo aiwa adodom lo difouf nigin idi imeid bun inon. Herod ĩ, Pasa naa ilele di, ganan meleid bun, Pita kot bun inenēf nigin kisi yalen.

⁵ Anī nigin, Pita kalabus bun dinenē ibodon, anī ere, sios idi Pita nigin Negur total bagai kosē difiyen.

⁶ Herod ĩ Pita fau nil kot bun ifarauf ye mog, bō anī bun, Pita sen uru nem ifokeleya ado kusī tamo uru atun mulã yenen, kalabus bobog lo fiya tamo, bobog tari de difaren. ⁷ Kaisã bagai, Odug nē engel wō ye di, kalabus Pita ibodon aab namen fula felen. Agef fen, engel Pita siri yu ken, turī fiyē

* **11:28:** Rom neid king odug.

iron, “Gama nem, fã wale!” Age fe di, Pita ima bun tamal sen irokakakesin.

⁸ Age fe di, engel Pita irokenen, “Ogon let luwã gu fen, sendel ufounkel.” Age fele di, engel Pita irokenen, “Ogon kolos meluk ufounkel, dō wiya.”

⁹ Pita engel dōf kalabus bun tamal ilen, anĩ ere, ã engel age fen are, momoi bagai be anĩ to kelein, ã malau seleulã kurã fe di, ailef yen. ¹⁰ Idi, kusĩ tamo kalabus bobog lo difedig uyulil ado anĩ dō fiya, wal difeid fen, taun isileya ain bobog bun disi di, sukar are yogo kã fel kenēdin, age fe di, idi ulolō desin. Idi naab taka luwe diyok disil fen, kaisã bagai engel Pita itornen.

¹¹ Age fe di, Pita weder fokōf mã, iron, “Momoi bagai aya gama keleĩ, Odug engel sur fe di, aya Herod nē megeir bun ado Juda tamo idi ereb wōya nigin kisi difen anĩ ganan bun tamal yalelnal.”

¹² Enei nigin weder fokō yel fen, Pita ã, Jon yana taka Mak dedig sina Maria nē fō bun ilen, an tamo kayau musei guru de fen, kosē def dibodon.

¹³ Pita fō sukar godu godu fe di, kabĩ kayau taka yana Roda dedig sukar kã foug nigin isin. ¹⁴ ã Pita ait karĩ ye fen, fatuk bagai kulĩ ye fen, ã sukar kã fiya sã, kel gudu ref ile fen, iron, “Pita yeir bobogē ifaref!”

¹⁵ Idi ã dirokenen, “Õ wadak.” Anĩ ere, kayau ã total bagai ino fen, agef irō di, idi diron, “Are Pita nē engel.”

¹⁶ Age de mog, Pita ã fau fau sukar godu godu fe di, idi sukar kã difel, Pita dile fen, terē den.

¹⁷ Pita foro dalauf nigin imam dogol fiyeid le fen, Odug ã kalabus bun tamal yalis irou isil anĩ

faded fiyeĩd fen, iron, “Jems tura tar geid od enei urokenēdigouf.” Age ye fen, Pita idi itorneĩd, uyu takã ilen.

¹⁸ Bonimeĩ di, kusĩ tamo Pita to dile fen, fatuk bagai nene de, abob to difen. ¹⁹ Herod Pita dimirnēf nigin irokenēdin, anĩ ere, idi ĩ to fotou difiyēn. Age dife di, Herod kalabus lo fiya tamo Pita lo difen idi to fiyeĩd le fen, kalabus lo fiya tamo anidi didenkesiyouf nigin irokenēdin.

Herod Laa Fen

Agef fen, Herod Judia distrik bun tamal Sisaria taun ile, sain naal an ibodon. ²⁰ Herod ĩ, Taia ado Saidon taun tamo kayau nigin name fatuk bagai sanen, anĩ ere, gama idi waud tekelei fen, Herod dilouf nigin disin. Uyulil idi Blastus, king nē ibodōya modoũ nē lo fiya mudur, ĩ idi isennēdiyof nigin dirokenē di, Blastus yo yen. Age de fen, idi Herod garan dile, maur gudũ fiya nigin dirokenen, ere nigin, idi king nē akor bun tamal saaf daledig.

²¹ Naa inon anĩ bun, Herod ĩ king nē kolos ifoukel, king nē sia bun ibod ken, tamo kayau od wogō fiyēdin. ²² Tamo kayau diweig diron, “Eĩ waitou ait, tamo nē sã.” ²³ Kaisã bagai, Odug nē engel Herod yũ iran, ere nigin, ĩ Negur yana to yalesen. ĩ mamatem dō di, laa fen.

²⁴ Anĩ ere, Negur nē od bilalaũ fel iyokelen.

²⁵ Banabas Sol ado, dogo neid kabĩ bure difel fen, Jerusalem keku de disin, idi Jon, yana taka Mak dedig dale fen, weim disin.

13

Idi Banabas Sol Ado Sur Difedin

¹ Antiok sios bun, profet ado tise difaren, are Banabas, Simeon yana taka Karos dedig, Lusius Sairini taun tamal, Manain (ĩ king Herod ado bibiyedin) ado, Sol. ² Idi Odug yana dales fen, kuri de mog, Awa Uur Fateul idi irokenēdin, “Banabas Sol ado kabĩ aya agirkenēdin anĩ dalouf nigin, gadi weleid kanag.” ³ Anĩ nigin, idi kuri de kosē del, imeid idi tetedin dino fen, sur difedin.

Oun Saipras Nuyo

⁴ Awa Uur Fateul, Banabas Sol ado sur fedid, idi Selusia taun dile fen, anenem waag dale, Saipras nuyo dilen. ⁵ Idi Salamis taun wõ de fen, Negur nē od Juda neid uub fõ fõ bun wogõ den. Jon idi isennēdiyof nigin, ĩ dale weim dilen.

⁶ Idi nuyo anĩ ganan atu diyok dile, Pafos taun wõ den. Idi an idegēya kosē tamo taka, idegēya profet Juda tamal, yana Bar-Jesus dedig fotou difen. ⁷ Bar-Jesus ĩ nuyo anĩ nē gawaman mudur Segius Paulus ado dibodon. Segius Paulus ĩ tamo kisi biya ado. Gawaman mudur ĩ, Negur nē od karĩ youf nigin, Banabas Sol ado iweignēdin. ⁸ Anĩ ere, idegēya kosē tamo Elimas (yana are Grik od nem ‘idegēya kosē tamo’) idi naabureid gudū fe di, gawaman mudur to momoi youf nigin age fen. ⁹ Age fe di, Sol, yana taka Pol dedig, Awa Uur Fateul barikā, ĩ idegēya kosē tamo lo fiyekel fen, iron, ¹⁰ “Õ Satan naal, õ Negur nē madur fiya ganan nē kiwai! Idegēya ado sesen ganan, õ bun isokosef. Õ ere sain anĩ, Odug nē naab madur anĩ,

idegēya bun falei fiyai wodig utorlauf? ¹¹ Gama Odug ima, ò teten isif. Ò malā ifofakalauf, ò sain naal meluk, gaa lalan to ulouf.”

Kaisā bagai, budū ado gugum isi, kerub fiyē di, ĩ taka nem ima gim foug nigin, ima ra yef iyon. ¹² Gawaman mudur ĩ agef wō yen anī ile fen, ĩ momoi yen, ere nigin, ĩ Odug nigin ifelnē di, ilen anī nigin terē yen.

Pisidia Distrik Nediwon Antiok Taun

¹³ Pol yogon kabī tura tar geid, waag dale, Pafosem, Pamfilia provins oun Perga taun dilen, an Jon idi itorneīd fen, Jerusalem kel ilen. ¹⁴ Idi Perga taun anenem, Pisidia distrik nediwon Antiok taun dilen. Sabat naa bun, idi Juda neid uub fō bun dile dibodon. ¹⁵ Lo ado profet neid itotoya diwesleid fen, Juda neid uub fō nē mudur adodo, Banabas Pol ado gein od sur dife fen, diron, “Turamā tar, ā tamo kayau waud yaleseya nigin od adouf are, wogōg.”

¹⁶ Pol fā ye, foro dalauf nigin imam fiyeīd le fen, iron, “Israel tamo kayau ado, haiden Juda tamo kayau geid Negur nigin anini gedig ā, karī wiyag! ¹⁷ Israel tamo kayau neid Negur, tubumā tar igrineīd fen, idi Isip dibodon sain, Negurem age fe di, idi fulus difen. Negur ĩ megeir odug nem, idi Isip tamal gurif irou ilen. ¹⁸ Negur ĩ, foti yar age fiya gerere tuan, idi tobonunā sane age difen anī lolou fesif isin. ¹⁹ ĩ Kanan teneub bun, tamo ibor sewen adok daūf iraile fen, dogo neid teneub, yogon tamo kayau idi akorouf nigin ifenēdin. ²⁰ Enei ganan fo handred fifti yar age fiya ilelen.

“Enei bure fele di, Negur ï, Israel tamo kayau es fiya tamo ifenēdif ile, profet Samuel nē sain bun. ²¹ Anī bure fele di, tamo kayau king nigin dirō di, Negur, Sol Kis naal, Benjamin nē ibor bun tamal ifenēdin, Sol foti yar king ibodon. ²² Negur Sol yalelne ken, ï Dawid idi neid king inenen. Negur Dawid nigin eig ye iron, ‘Aya, Jesi naal Dawid ï, tamo aya wau irok kilei anī ailen, ï erēb erēb ganan, neu oroya yenek anī dōf age foug.’

²³ “Negur ï age afoug yen kilei, Dawid nē ibor nē tubu tar bun tamal, kel yaleya tamo Jesus Israel ifenēdin. ²⁴ Jesus fau isiya sã mog, Jon Israel tamo kayau ganan waud falei ye di, naan igunēdiyof nigin od wogō yen. ²⁵ Jon ï yogon kabī idikalau fenē mog, ï iron, ‘Aya nigin ã aim gef? Aya tamo ï tari gef anim sã. Anī ere, ï aya dumeun dō fiyaf, aya to biya nigin yogon su malū biru fediya kisi feleya sã.’

²⁶ “Turau tar, Abraham gere tar ado, haiden ã Negur nigin anini gedig, Negur tamo kayau kel yaleya nē od, amã bun sur fen. ²⁷ Jerusalem tamo kayau, dogo neid mudur adodo geid, Jesus ado, profet neid od Sabat naa ganan bun diwesedig anī to kelei ken, Jesus bouwa bun od dun, anī bunem profet neid od kisi fel wō yen. ²⁸ Idi Jesus dukesiyof nigin, gariya taka to dilen, anī ere, idi ï dukesiyof nigin, Pailat dirokenen. ²⁹ Idi Jesus nigin Negur nē Itotoya bun yenek anī ganan, dō de age difel fen, idi ï aa tetek bun tamal dalisne ken, matmat bun dinenen. ³⁰ Anī ere, Negur Jesus laa bun tamal kel turī fe di, mata kel fã yen. ³¹ Agef fen, Jesus, tamo idi, ï geid Galili teneub

bun tamal Jerusalem dilen anidi bun, naa musei wõ yen. Idi anidim gama, tamo kayau bun, ï nigin wogõ def dilef.

³² “Amã biya od ã marokeneik, Negur tubumã tar age afouf fiyēdin are, ³³ Jesus kel turĩ fiyen anĩ bunem, amã idi gereneid tar kisi fel naman. Sam tu bun itotoya yenek kilei:

“ Õ neu Kesu,
aya gama õ Tamã wõ aul.’*

³⁴ Negur ï laa bun tamal kel turĩ fiyē di, ï to bagai bura lauf nigin, Negur eig ye iron:

“ ‘Aya momoi bagai nē ado fateul nē el fiya, are aya Dawid afenēf aun anĩ, ã afeneif.’†

³⁵ Negur nē Itotoya taka buneg eig ye irok:

“ ‘Õ ogon Fateul Tamo to utorõ di, bura lauf.’‡

³⁶ “Dawid ï yogon sain bun, Negur nē oroya anĩ aruna yale fen, laa fen. Ï tubu tar geid mũ dife di, bouwa bura len. ³⁷ Anĩ ere, Negurem laa bun tamal kel turĩ fiyen ï, bura leya san.

³⁸ “Anĩ nigin, turau tar, ã keleĩ youf, Jesus bunem mosor weder tu keleya nigin od wogõ yeik. ³⁹ Tamo ganan Jesus nigin momoi def, mosor ganan yalelkeneid fen, madur fedif, anĩ ere, Moses nē Lo bunem, tamo neid mosor ganan yalelkeneid fen, madur fediya kisi feleya sã.

⁴⁰ Anĩ nigin, profet wogõ den anĩ, ã bun to wõ youf nigin lo weleg:

⁴¹ “ ‘Ulegef, ã kono fiya tamo!

Terēg fen, gare gouf,
ere nigin, aya ãgenei sain bun ereb taka age afouf,

* **13:33:** Sam 2:7 † **13:34:** Asaia 55:3 ‡ **13:35:** Sam 16:10

are taka nem irokeneĩfeg,
ã to bagai momoi gouf.’§ ”

⁴² Pol Banabas ado, Juda neid uub fõ ditor dile mog, tamo kayau, Sabat naa taka bun, od enei baban tobol difouf nigin dirokenẽdin. ⁴³ Tamo kayau dilele di, Juda tamo kayau musei ado, haiden Juda neid momoiya bun falei de fen, Negur nigin anini dedig musei idi, Pol Banabas ado dõ difedin. Age dife di, Pol Banabas ado weim wogõ de fen, idi Negur nẽ wau ifenẽya bun toku dibodõf nigin waud dalesen.

⁴⁴ Sabat naa taka bun, taun dibodõdig anidi musei ganan, Odug nẽ od karĩ douf nigin guru difen. ⁴⁵ Anĩ ere, Juda tamo idi, tamo kayau guru difen anidi dileid fen, kiyeim aura fiyẽdi di, Pol wogõ yen anĩ nigin kiwai difen ken, kono difiyen.

⁴⁶ Age dife di, Pol Banabas ado kumĩ sã wogõ eig de diron, “Amã Negur nẽ od, ã bun ketem sã wogõ mayeim. Anĩ ere, ã Negur nẽ od utorõg fen, amã to biya nigin mata faimud ibodkeleya to malouf gen. Anĩ nigin, amã gama haiden gedin melef.

⁴⁷ Are Odug eig ye irokanaman:

“ ‘Aya õ haiden neid lalan anenon,
anĩ bunem, teneub idikelediya bun, tamo
kayau usenneĩd, kel gei wediyouf.’* ”

⁴⁸ Haiden idi od enei karĩ de fen, waud kulĩ ye, Odug nẽ od seli dabin. Mata faimud ibodkeleya nigin igirnẽdin anidi ganan momoi den.

⁴⁹ Age dife di, Odug nẽ od, teneub anĩ ganan bun iyokelen. ⁵⁰ Anĩ ere, Juda tamo idi, haiden kayau yeneid adodo Negur nigin anini dedig ado,

§ 13:41: Habakuk 1:5 * 13:47: Asaia 49:6

taun uyu irouya tamo anidi nameid dalesen. Idi Pol Banabas ado darau difenēdiyof nigin, tamo kayau nameid dalese di, dogo neid teneub bun tamal dirudidin. ⁵¹ Anī nigin, Pol Banabas ado, idi neid tobonunā sane anī difelnēdi di, kelei youf nigin, yeid aas tu difel fen, Ikonium taun dilen. ⁵² Dō fiya tar idi, kulīya ado Awa Uur Fateul barikan.

14

Oun Ikonium Taun

¹ Oun Ikonium taun, Pol Banabas ado, idi gai age difedig gen, Juda neid uub fō bun dile fen, an tamo waud yaleya bun wogō de di, Juda tamo kayau ado Grik tamo kayau musei momoi den. ² Anī ere, Juda tamo momoiya sã anidim, haiden idi nameid dalese di, haiden idi, momoiya tamo kayau kiwai difenēdin. ³ Anī nigin, Pol Banabas ado, sain meluk an dibod ken, Odug nigin kumī sã wogō den. Age dife di, Odug ī, idi memelik uris ado dinodiyof nigin, megeir ifenēdin, anī bunem, Odug yogon wau ifenēya nē od anī megeir fen. ⁴ Tamo kayau taun temeleid faraf fen, tunī Juda tamo geideid, tunī aposel geid. ⁵ Age de fen, Juda tamo ado haiden, dogo neid uyu irouya geid, aposel to biya difiyeid fen, meein tulu difiyēdiyof nigin age difen. ⁶ Anī ere, aposel idi anī kelei ken, idi diya, Likonia distrik nediwon Lистра taun, Derbe taun, anī kalilī fiya bun diyok dile fen, ⁷ an biya od wogō den.

Oun Lистра ado Derbe Taun

⁸ Oun Listra taun, tamo taka ye ilolaisin ibodon, ï sina namenem ye ilolaisin wõ yen, anĩ to iyõdig. ⁹ Ï, Pol od wogõ ye mog, karĩ fiyen. Pol ï lo fiyekel fen, ï bouwa biya lauf nigin momoiya ado anĩ ile fen, ¹⁰ Pol ait odugem iweig iron, “Fã wale ufar!” Age ye di, ï gurusã ye, iyok ilen.

¹¹ Tamo kayau musei Pol age fen anĩ dile fen, Likonia od nem diweig diron, “Waitou tamo falei difel fen, ada gein disil!” ¹² Idi Banabas ï Sus difiye ken, Pol ï Hermes difiyen, ere nigin, Pol ï ait ado tamo. ¹³ Waitou Sus nẽ tempel, taun yerin ibodon. Waitou Sus nẽ pris, bulmakau bobõ gĩ fediya adodo, taun bobogẽ irou isin, ere nigin, ï tamo kayau musei geid, aposel sesewi fiya difenëdiyof nigin age fen.

¹⁴ Anĩ ere, aposel Banabas Pol ado, anĩ karĩ de fen, dogo neid kolos serek difeid fen, tamo kayau musei atun gududu de dile diweig diron, ¹⁵ “Tamo kayau, ã ere nigin enei ago gef? Amãg tamo maug, ã gen. Amã ã gein biya od marou masif, are ã kaũ sã enei utorõg fen, mata ibodõya Negur ï, saa, teneub, maaĩ ado, anidi namen erëb erëb ganan inodin, ï bun falei gouf nigin marokeneik. ¹⁶ Kulu Negur ï tamo kayau teneub ganan bun itornëdi di, dogo neid oroya dõ difen. ¹⁷ Anĩ ere, Negur ï yogo nigin yaor fiya to itor ken, faimud erëb erëb biya age fedig anĩ bunem, yogo nigin yaor fedig. Ï saa bunem uyẽ ado, saaf dogo neid sain dõf fen, ifeneĩdig. Ï saaf musei biya ifenei ken, wauĩ bun kulĩya ifeneĩdig.” ¹⁸ Od enei nemeg, tamo kayau musei aposel sesewi difenëdiyof nigin age difen, anĩ ere, aposel idi

naabureid gudū difenēdiyof nigin lakī difen.

¹⁹ Age dife di, Juda tamo tunī, Antiok ado Ikonium taun temeleid disi fen, tamo kayau musei waud dalen. Age de fen, idi Pol meein tulu difiyē, laa fel de fen, taun yerin diror diroulen. ²⁰ Anī ere, dō fiya tar guru de, Pol salili difiyē di, ī fā yale fen, baban taun kel ilen. Naa taka di, ī Banabas ado Derbe taun dilen.

Aposel Siria Distrik Oun Antiok Taun Keku Den

²¹ Idi taun anī bun biya od wogō de fen, dō fiya tar musei dalen. Age difel fen, idi Listra, Ikonium ado, Antiok taun keku de dile, ²² dō fiya tar megeir difiyeīd fen, idi momoiya bun dibodōf nigin waud dalesen. Idi diron, “Ada Negur nē tano bun ileya nigin, morō musei talouf bagai.” ²³ Pol Banabas ado, sios mugu mugu bun, uyu irouya digirneīd fen, kosēya ado kuriya bunem, Odug idi ī nigin momoi dedig, ī ima bun dinenēdin. ²⁴ Idi Pisidia distrik atu diyok dile, Pamfilia provins bun wowā den. ²⁵ Age de fen, idi Perga taun an od wogō del fen, Atalia taun disilen.

²⁶ Idi Ataliam waag dale, Antiok keku de dilen, kulu an, sios, kabī gama bure difelex anī nigin, aposel idi Negur nē wau ifenēya bun dinenēdin. ²⁷ Idi Antiok taun wowā de fen, sios kuru difeid fen, Negur idi bunem ereb age fen anī ganen ado, Negur ī haiden momoi douf nigin sukar kā fen anī, wogō difiyēdin. ²⁸ Age dife fen, idi, dō fiya tar geid, sain meluk an dibodon.

15

Guru Fiya Oun Jerusalem

¹ Tamo tunĩ, Judia distrik bun temeleid Antiok taun disi fen, momoiya tamo kayau eig de difelnēdin, “Ã Moses nē tobonunã kilei, mulũ to ulagauf are, ã kel gei yeĩya kisi feleya sã.” ² Od enei nigin, idi Pol Banabas ado geid fatuk bagai fefe de fen, luwa diroun. Anĩ nigin, momoiya tamo kayau enei nigin Jerusalem disel fen, aposel ado uyu irouya geid to difiyēdiyof nigin, Pol Banabas ado momoiya tamo tunĩ geid digirnēdin. ³ Sios idi sur difedi di, Foniaia ado Samaria distrik atu dile fen, haiden idi Negur bun falei den anĩ dirokenēdin. Od eneim, momoiya tamo kayau ganan fatuk bagai kulĩ den. ⁴ Idi Jerusalem wõ de di, sios, aposel geid, uyu iroudiya anidim idi aan difiyēdin. Age dife di, Negur idi bunem ereb age fen anĩ ganan, sios, aposel geid, uyu iroudiya wogõ difiyēdin.

⁵ Age dife di, momoiya tamo tunĩ Farisia mala bun temeleid, fã de fen, diron, “Haiden idi mulũ dile fen, Moses nē Lo dõ difouf nigin dirokenēdiyof bagai.”

⁶ Age de di, aposel idi, uyu iroudiya geid, od enei nigin guru de katõ difen. ⁷ Od musei sain meluk katõ difen sain, Pita fã yale irokenēdin, “Turau tar, ã keleĩ, kulu, sain taka bun, haiden idi aya sigorou bun biya od karĩ de fen, momoi douf nigin, ã atun Negur aya igirnan. ⁸ Negur ã, tamo nē wau keleĩ, ã Awa Uur Fateul, ada ifanadan gen, haiden idig ifenēdin anĩ bunem, idig yaledin anĩ ifelnēdin. ⁹ Negur, ada ado idi geid atun daũ taka to inon, ere nigin, momoiya bunem ã waud kulo feledin. ¹⁰ Anĩ ere, ere nigin ã gama Negur kisi

wiyēg fen, morō adag age fiya, tubuda tareg faali fiya kisi feleya san anī, dō fiya tar tetedin unougouf nigin ago gef? ¹¹ Sā! Ada, idi agef kel gei fedif gen, neda Odug Jesus nē wau ifenēya bunem, adag agef kel gei fadaf anī momoi tauf.”

¹² Tamo kayau ganau guru difen anidi ganau foro del fen, Banabas Pol ado, Negur idi bunem memelik ado uris fire fire haiden atun inodin anī wogō de di, karī den. ¹³ Idi wogō dele di, Jems ī iron, “Neu turau tar, karī wiyag. ¹⁴ Simon mogo faded fadal, are Negur ī yogo yana nigin ye fen, haiden atun tamo kayau yaledin anī bunem, ī urug bagai haiden nigin wau yenen anī ifelnadan. ¹⁵ Profet neid od are, enei ado susu felef, are Negur nē Itotoya bun eig ye irok kilei:

¹⁶ “ ‘Enei dumen, aya kelau fen,

Dawid nē salafat kubū yen anī baban alesauf.
Aya sesen ledin anī madur afeleid fen,
baban anouf,

¹⁷ anī bunem, tamo kayau ganau atun tunī ado,
haiden ganau neu nigin agirnēdin geid,
Odug dimirnēf.’* ”

¹⁸ Odug ī enei kulu bagai yaor fen, ī anī agef irok.

¹⁹ “Anī nigin, neu es fiya bun, ada haiden Negur bun falei def anidi, morō to tafenēdiyof. ²⁰ Age fiya ban, ada pas tatot fen, idi saaf idegēya waitou bun sesewi difen anī to dāf nigin, noli tobonunā bun to dilauf nigin, yaro uleid kakā difeid fen, didenkesif anī to dāf nigin ado, yaro naud adodo to dāf nigin torokenēdiyof. ²¹ Ere nigin, sain meluk bagai, Moses nē Lo taun ganau bun wogō

* **15:17:** Amos 9:11, 12

de fen, Sabat naa ganan bun Juda neid uub fõ fõ bun diwesedig.”

Guru Fiya Nē Pas Haiden Momoiya Tamo Kayau Bun Sur Difen

²² Age ye di, aposel idi, uyu iroudiya ado, sios ganan geid, idi atun tamo tunī digirneīd fen, Pol Banabas ado weim Antiok taun sur difediyouf nigin kisi difon. Idi Judas (yana taka Basabas dedig) ado Sailas digirnēdin, tamo uru anidi, momoiya tamo kayau atun, idi uyu irouya. ²³ Idi bun pas eig de ditoton anī sur difen:

Amā aposel, uyu iroudiya geid, āgenei tureī tar, haiden bun temeleī turamā tar Antiok taun, Siria ado, Silisia provins bun ubodōgef aan mayeik.

²⁴ Amā nemā tamo tunī, yoya to dale fen, dile, idi neid wogōya bunem gelele diyei ken, wauī morō difenein anī, amā karī maun. ²⁵ Anī nigin, amā ganan kisi tekelei mano fen, tamo tunī magirneīd fen, nemā oboimā tar bagai Banabas Pol ado geid ā gein sur mafedif. ²⁶ Banabas Pol ado idi, neda Odug Jesus Kristus yana nigin, dogo neid mata itorōya nigin to fese den. ²⁷ Anī nigin, amā matotkeneik anī sigoredim megeir fiya nigin, Judas Sailas ado sur mafedif. ²⁸ Awa Uur Fateul, amā geid, kisi tekelei fen, ā bun nun enei teten baban morō taka to mafeneif nigin yo maun: ²⁹ Ā saaf idegēya waitou bun sesewi difen anī to wāgauf, yaro naud adodo to wāgauf, yaro uleid kakā difeid fen, didenkesif

anĩ to wāgauƒ ado, noli tobonunã bun to ula-
gauƒ. ã enei adok irok kilei sese gouƒ are, ã
nigin deuf.

Dabuo.

³⁰ Tamo idi sur difedi di, Antiok taun disil, sios
kuru difeid fen, pas anĩ difenēdin. ³¹ Tamo kayau
pas anĩ diwes fen, waud yaleseya od anĩ nigin
kulĩ den. ³² Judas Sailas ado, idi dogo profet,
momoiya tamo kayau waud dales fen, megeir
difenēdiyof nigin od fatuk wogō den. ³³ Idi an
sain naal meluk dibodon, age dife di, momoiya
tamo kayaum waud inosiya ado sur difedi di, idi
sur difedin anidi gedin keku de dilen.† ³⁵ Anĩ
ere, Pol Banabas ado Antiok dibodon, an idi tunĩ
museig geid fen, Odug nē od difelneĩd fen, wogō
den.

Pol Banabas Ado Waud Tekelei San

³⁶ Naa tunĩ ilele di, Pol Banabas irokenen, “Ada
keku tau fen, taun ganan Odug nē od wogō
tafiyēdin nē an turada tar ki tafiyēid fen, idi naig
difef anĩ tailauf.” ³⁷ Banabas ĩ, Jon yana taka Mak
dedig, idi geid dilauf nigin oron, ³⁸ anĩ ere, Pol ĩ
weim dilauf are to biya ye kisi fen, ere nigin, Jon
ĩ Pamfilia provins oun idi itorneĩd fen, idi geid
kabĩ to dalef dilen. ³⁹ Idi fatuk bagai fe de fen,
fara difen. Banabas ĩ Mak yale fen, waag bun
Saipras nuyo dilen, ⁴⁰ anĩ ere, Pol ĩ Sailas igirnē di,
momoiya tamo kayaum Odug nē wau ifenēya bun

† **15:33:** Itotoya tunĩ eig ye irok: dilen. ³⁴ Anĩ ere, Sailas ĩ an
ibodōf nigin kisi fen.

dinenēdi di, dilen. ⁴¹ Ī Siria ado Silisia provins atu ile fen, sios megeir fiyēdif ilen.

16

Timoti Ī Pol Sailas Ado Weim Dilen

¹ Pol ĩ Derbe taun isi fen, anenem Listra taun ilen, an dō fiya tamo taka yana Timoti ibodōdig, ĩ sina Juda tamal momoiya kayau, anī ere, ĩ tama Grik tamal. ² Momoiya tamo kayau Listra ado Ikonium taun temeleid, Timoti biya difiyēdig. ³ Pol ĩ Timoti ado dilauf nigin oron, anī nigin, ĩ, Juda tamo modoũ anī bun dibodōdig anidi nigin, Timoti mulũ inenen, ere nigin, idi ganan keleĩ, Timoti ĩ tama Grik tamal. ⁴ Idi taun mugu mugu bun diyok dile fen, oun Jerusalem aposel idi uyu iroudiya tamo geid, tamo kayau dō difouf nigin od difon anī wogō difiyēdif dilen. ⁵ Anī bunem, sios idi momoiya megeir dale fen, naa ganan momoiya tamo kayau ifagaf ilen.

Pol Mala Seleulã Kurãf Fen, Masedonia Tamo Taka Ilen

⁶ Pol yogon kabĩ tura tar geid, Frigia distrik ado Galesia provins bun diyok dilen, ere nigin, Awa Uur Fateul, idi Asia provins bun od wogōya nigin katũ fiyēdin. ⁷ Idi Misia distrik nē daũ bun disi fen, Bitinia provins bun dilauf nigin age difen, anī ere, Jesus nē Awa Uur ĩ katũ fiyēdin. ⁸ Anī nigin, idi Misia distrik wal dife fen, Troas taun disilen. ⁹ Bō anī bun, Pol mala seleulã kurãf fen, Masedonia provins tamal tamo taka ifar fen, igonen, “Masedonia usi fen, usennamã,” fiyē mog, ilen. ¹⁰ Pol mala seleulã kurãf fen, anī ilen,

age fel fen, amã kaisã bagai Masedonia provins malauf nigin dodok mafen, ere nigin, amã kisi mafen, Negur idi bun biya od wogõ mauf nigin iweignaman.

Filipai Taun Oun Lidia Jesus Nigin Momoi Yen

¹¹ Troas taun anenem, amã waag bunem madur kilei Samotres nuyo melen, naa taka di, Neapolis melen. ¹² Anenem amã Filipai melen, Filipai are Rom gawamanem lo fedig, Masedonia provins bun taun anĩ uyu irouf. An naa tunĩ mabodon.

¹³ Sabat naa bun, amã taun mator ken, taun bobog serẽ naan yerin an, amã kosẽya nẽ modoũ mamirẽf nigin melen. Amã mabod ken, kayau an guru difen anidi wogõ mafiyedin. ¹⁴ Idi neid taka karĩ faman, kayau anĩ yana Lidia, Taiataira taun tamal, ã gabar kadaũ na nigin susur fedig, ã Negur yana yalesedig. Odug, ã Pol nẽ od karĩ youf nigin wau bun sukar kãf kenen. ¹⁵ Kayau anĩ yogon ibor tar geid naan diguneĩd kele di, ã yogon fõ bun malauf nigin irokanama ken, iron, “Aya Odug nigin momoi auf agef kisi gouf are, umag, neu fõ bun ubodõg.” ã nugo famã di, amã dõ mafiyen.

Pol Sailas Ado Kalabus Bun

¹⁶ Naa taka bun, kosẽya nẽ modoũ bun mele mog, ferfer kayau momoul taka fotou faman, ã kaa sane ado, anĩ bunem ereb fau wõ youf anĩ wogõ yedig. Yogon marau tar, ã ereb fau wõ youf anĩ wogõ yedig anĩ bunem, moni musei daledig. ¹⁷ Kayau momoul enei, amã Pol geid dõ fama ken, iweig iron, “Tamo eneidi Negur Ilun Bagai

nē ferfer tar. Idi ã isennēya walogouf nē naab dirokeneik.” ¹⁸ Kayau ï naa musei age fe di, Pol wau fatuk bagai moro ken, falei ye, kaa sane irokenen, “Jesus Kristus yana bunem, aya ï bun tamal ulō wesiyouf nigin arokonok!” Sain anī bun bagai, kaa sane kayau anī itornen.

¹⁹ Ferfer kayau momoul nē marau tar, moni yaleya nē naab gudū felen anī kelei ken, Pol Sailas ado gei de didū difeid, maket modoū bun yeneid adodo tamo gedin dirouledin. ²⁰ Idi Rom neid lo es fiya tamo bun guri difeid dile fen, diron, “Tamo eneidi are Juda temeleid, idi neda taun bun morō odug dinof. ²¹ Idi tobonunā difelnēdif are neda lo to irok anī, ada Rom tamo, anī nigin, ada tobonunā enei to talouf, to dō tafouf.”

²² Age de di, tamo kayau, idi geid bagu de fen, Pol Sailas ado kiwai difenēdin. Age dife di, Rom es fiya tamo kolos dinukaka keneīd fen, wagagā difediyouf nigin dirokenēdin. ²³ Idi fatuk bagai wagagā difiyeīd kelei fen, kalabus bun dinenēdin. Age dife fen, kalabus lo fiya tamo el fe lo fediyouf nigin dirokenen. ²⁴ Kalabus lo fiya tamo od anī yale fen, kalabus fō aab namen ineneīd fen, yeid aam kotū feledin.

²⁵ Bō atun age fiya, Pol Sailas ado Negur kosē difiye ken, seg dale mog, kalabus tamo ganan karī difiyēdin. ²⁶ Kaisā bagai, mimī odug fā ye fen, kalabus fō gariya anī guyō fen. Kaisā bagai, kalabus fō nē sukar ganan kā feleid fen, kalabus tamo ganan bun sen irokaka kalaisi keledin. ²⁷ Kalabus lo fiya tamo irik yel fen, kalabus fō nē sukar kā felediya ilen, agef fen, ï kisi fen, kalabus

tamo diyalelel ye fen, yogon dimig ul feis, yogo bouwa yukesiyouf nigin age fen. ²⁸ Anĩ ere, Pol iweig iron, “Õ ogo bouwã to tũ wo! Amã ganan yeir!”

²⁹ Kalabus lo fiya tamo yal nigin iweig fen, namen gudu ref ile, Pol Sailas ado yedin kubũ ye, tererẽ yen. ³⁰ Agef fen, idi gurif irou, mayarẽ isi fen, to fiyẽdin, “Tamo bibiyeĩ, aya naig afe fen, isennẽya alouf?”

³¹ Idi diron, “Odug Jesus nigin momoi wouf are, õ isennõf, õ ogon ibor tar geid.” ³² Age de fen, idi Odug nẽ od, ã ado ganan yogon fõ bun dibodon anidi geid, wogõ difiyẽdin. ³³ Sain anĩ bun bagai bõ, kalabus lo fiya tamo, Pol Sailas ado gurif iroule, bouweid gali gedin anĩ kulo fedin. Age fel fen, kaisã bagai ã yogon ibor tar ganan geid, naan digunẽdin. ³⁴ Kalabus lo fiya tamo, idi yogon fõ aaben gurif iroule, saaf ifenẽdin. Ì wau kulĩya barikan, ere nigin, ã Negur nigin momoi yen, yogon ibor tar ganan geid.

³⁵ We fele di, Rom es fiya tamo, dogo neid kabĩ tamo anidi bun, kalabus lo fiya tamo gein od sur difen, “Tamo anidi walisneĩd.” ³⁶ Age difiyẽ di, kalabus lo fiya tamo Pol irokenen, “Rom es fiya tamo, õ Sailas ado alisneĩf nigin dirokanal. Gama ã wadã ulagauf. Wauĩ inosiya ado ulagauf.”

³⁷ Anĩ ere, Pol kabĩ tamo irokenẽdin, “Amã Rom tamo ba, anĩ ere, idi to es difama ken, amã mal atun wagagã difaman. Age dife fen, amã kalabus bun dinenaman. Anĩ gama idi iminẽyan dirumã fenẽ de? Sã! Idi dogo disì, dalisnama ken, dinenamãf.”

³⁸ Kabĩ tamo, od enei Rom es fiya tamo diro-kenēdin. Pol Sailas ado idi Rom tamo yeya anĩ karĩ de fen, idi kumĩ den. ³⁹ Idi Pol Sailas ado gedin bobo difiyēdiyof nigin disi fen, kalabus bun tamal dalis dinenēdin. Age dife fen, Rom es fiya tamo idi, Pol Sailas ado taun anĩ ditor dilauf nigin dirokenēdin. ⁴⁰ Pol Sailas ado, kalabus bun tamal ulolō deis fen, Lidia nē fō bun dilen, idi an momoiya tamo kayau fotou difeid, waud dales le fen, ditorneĩd dilen.

17

Oun Tesalonika Taun

¹ Pol Sailas ado, Amfipolis ado Apolonia taun atu diyok dile fen, Tesalonika taun wō den, an Juda neid uub fō ibodon. ² Pol ĩ gai age fedig gen, Juda neid uub fō bun ilen. Sabat naa towo bun, ĩ Negur nē Itotoya bun ibodok anĩ, tamo kayau geid katō de, ifelneĩd fen, ³ Kristus ĩ darau yale fen, laa bun tamal mata kel fã youf bagai nigin, el fe faded fiyēdin. Pol iron, “Jesus enei aya ā arokeneik are, ĩ anĩ Kristus.” ⁴ Juda tamo kayau tunĩ karĩ de, momoi de fen, Pol Sailas ado dō difedin, Grik tamo kayau museig Negur nigin anini dedig ado, kayau yeneid adodo museig age difen.

⁵ Anĩ ere, Juda tamo, Pol Sailas ado kiyēĩ difeneĩd fen, maket modoũ bun tamo sesen tunĩ kuru difeid waud dalese di, tamo kayau guru difalasi fen, taun anĩ bun kakaĩ den. Idi Pol Sailas ado, tamo kayau bun diroulediyof nigin, Jeson nē fō bun dile dimirnēdin. ⁶ Anĩ ere, idi Pol Sailas ado to fotou difeid fen, Jeson momoiya

tamo tunĩ geid didũ difeid, taun nẽ uyu iroudiya gedin dirouleid fen, diweig diron, “Tamo eneidi teneub ganan bun morõ difenẽdin anĩ gama yeir disin. ⁷ Age dife di, Jeson idi aan fiyeid fen, yogon fõ aaben gurif iroulen. Idi ganan Sisa nẽ lo difodul ken, king taka yana Jesus dedig ibodok, age de wogõ dedig.” ⁸ Tamo kayau ado, taun nẽ uyu iroudiya geid, od enei karĩ de fen, ninibur den. ⁹ Age dife fen, taun nẽ uyu iroudiya, Jeson ado tamo tunĩ geid kot na dalouf nigin dirokenẽdi di, na dalen, age difele di, ditornẽdi di, dilen.

Oun Berea Taun

¹⁰ Bo kele di, kaisã bagai momoiya tamo kayau, Pol Sailas ado Berea taun sur difedin. Idi an wõ de fen, Juda neid uub fõ bun dilen. ¹¹ An Berea tamo kayau idi, Tesalonika tamo kayau gen sã, idi wedereid dino fen, od karĩ dedig. Idi waud adod fen, od karĩ den, age de fen, idi Pol wogõ yen anĩ, momoi be dilouf nigin, naa ganan Negur nẽ Itotoya felei difedig. ¹² Juda tamo kayau musei momoi den, age fiya bagai, Grik kayau yeneid adodo musei ado Grik tamo museig momoi den.

¹³ Tesalonika taun an Juda tamo idi, Pol Negur nẽ od oun Berea tauneg irok ya karĩ de fen, idig an dile, tamo kayau nameid dalese di, seye den. ¹⁴ Age dife di, momoiya tamo kayau, kaisã bagai Pol maaĩ ubun sur difiyen, anĩ ere, Sailas Timoti ado idi an Berea taun dibodon. ¹⁵ Tamo tunĩ Pol dinenekel fen, weim Atens taun dilen, Pol ĩ, Sailas Timoti ado kaisã bagai ĩ gein disiyouf nigin, irokenẽdi di, idi keku de dilen.

Oun Atens Taun

16 Pol, oun Atens Sailas Timoti ado tari fedin, agef fen, ï idegēya waitou taun anĩ bun isokosen anĩ ile fen, wau fatuk moron. 17 Anĩ nigin, Pol ï, Juda tamo kayau ado, Grik tamo kayau Negur nigin anini dedig geid, Juda neid uub fõ bun wageid yalouf nigin od solo difedin, ï naa ganan maket modoũ bun, tamo kayau idi dilef disif difedig geideg, wageid yalouf nigin od solo difedin. 18 Epikurian ifelnēdiya tamo* tunĩ ado, Stoik ifelnēdiya tamo† tunĩg, Pol geid fefe den. Idi tunĩ to difen, “Golẽ tamal enei, ere od wogõ you fenẽ?” Tunĩ diron, “Ï yaũ waitou nigin wogõ yef be.” Idi age de diron, ere nigin, Pol ï Jesus nigin ado, laa bun tamal mata kel fāya nigin, biya od wogõ yen. 19 Age fe di, idi Pol dale, taun uyu irouya neid guru fiya, yana Areopagus dedig, an dirou dile fen, diron, “Keleĩ mata enei urokana-mak anĩ, amã tau keleĩ youf? 20 Õ keleĩ mata bagai wederaman urou usif, ereb gariya nigin irok anĩ, amã keleĩ you fenẽ.” 21 (Atens tamo kayau ganan ado yaũ tamo kayau an difaredig idi, sain ganan kisi mata mata nigin karĩ yei dedig, wogoĩ dedig, idi kabĩ taka to daledig.)

22 Age de di, Pol Areopagus guru fiya atun ifar fen, iron, “Atens tamo, ereb ereb ganan bun, ã waitou karĩ fiyēya nigin kisi fatuk unogedig anĩ ailef. 23 Ere nigin, aya ayo ken, ereb ereb yana walesegedig fele afedin, aya alta takag itotoya enei ado ailen: WAITOU, ADA KELEĨ SÃ ANĨ BUN.

* **17:18:** Epikurian tamo idi bouwa buru nē oroya nigin al difedig. † **17:18:** Stoik tamo idi bouwa buru nē oroya lai fiya nigin al difedig.

Ã kelei sã anĩ yana walesegedig nigin, aya yaor afe arokeneik.

²⁴ “Negur ĩ, teneub ado ereb ereb ganan anĩ namen difaref inodin, ĩ anĩ, saa ado teneub nẽ Odug nigin, ĩ tamo imedim tempel dinodin anĩ bun to ibodõdig. ²⁵ ĩ ereb taka to lau fedig, anĩ nigin, tamo imam ereb taka ifenẽya kisi feleya sã, ere nigin, ĩ yogo tamo ganan mata, si neseya ado, ereb ereb ganan ifenẽdidig. ²⁶ Tamo tekelei bunem, ĩ tamo kayau fire fire ganan inodin, idi teneub adok ino yalouf nigin age fen. ĩ dogo neid sain ifeneĩd fen, idi ibodõya nẽ modoũ daũ fire fire ifenẽdin. ²⁷ Tamo ĩ dimirnẽf nigin, imeid ra de dimirek dile, fotou difiyẽf nigin be, ĩ age fen. Anĩ ere, ĩ ada mugu mugu bun gerõ to ibodok. ²⁸ ‘ĩ bun ada mata tabod ken, telef tasif tafef, tabodok.’ Āgenei itotoya tamo tunĩg eig de diron, ‘Ada yogon gere tar.’

²⁹ “Age fiya bagai, ada Negur nẽ gere tar, anĩ nigin, ada kisi to eig tauf, waitou ĩ, gol nem, silwa nem, meein nem be, tamo nẽ kisim ado imam malakanon inodig age fiya, to tauf. ³⁰ Tamo kayau Negur nigin to kelein sain, idi to kelei ken, age difedig anĩ, Negur to eweid yon, anĩ ere, gama ĩ, tamo kayau adok teneub ganan bun waud falei youf nigin irokenẽdif. ³¹ ĩ naa inon anĩ bun, ĩ tamo igirnen ĩ bunem, teneub ganan madur fiya bun es fouf. Negur ĩ laa bun tamal mata kel turĩ fe di, fã yen anĩ bunem, enei agef wõ youf anĩ tamo ganan ifelnẽdin.”

³² Laa bun tamal mata kel fãya nigin, Pol wogõ yen anĩ karĩ de fen, tunĩ Pol kasã difiyen, anĩ

ere, tunĩ diron, “Amã enei nigin baban karĩ mayõ fenẽ.” ³³ Age de di, Pol guru fiya anĩ itor ilen. ³⁴ Tamo tunĩ Pol dõ dife fen, momoi den. Idi atun, Dionisius, guru fiya yana Areopagus neid taka, kayau taka yana Damaris ado, tunĩ geid, dibodon.

18

Oun Korin Taun

¹ Enei bure fel fen, Pol Atens taun itor ken, Korin taun ilen. ² Pol ã, an Juda tamo taka yana Akwila, Pontus provins tamal, fotou fiyen, Akwila ã aiwa Prisila ado Italim disi dibod dirubkelen, ere nigin, Sisa Klodius, Juda tamo kayau ganan Rom taun ditorõf nigin total od irokenẽdin. Pol idi ilediyof nigin ilen. ³ Agef fen, Pol ã an idi geid dibod ken, weim kabĩ dalen, ere nigin, ãg idi gen salafat inoya tamo. ⁴ Sabat naa ganan, Pol Juda neid uub fõ bun, Juda tamo kayau ado Grik tamo kayau geid, od kuruwa difedig, are idi kisi falei de momoi douf nigin age fedig.

⁵ Sailas Timoti ado Masedoniam disi di, Pol ã Juda tamo kayau bun, Jesus ã anĩ Kristus fiyeĩd fen, wogõ ye kurõ fessin, ã yogon sain adok kabĩ anĩ bun inon. ⁶ Anĩ ere, Juda idi Pol kiwai difen ken, kono difiyẽ di, ã so fiyeĩd fen, yogon kolos tu fel fen, irokenẽdin, “Ã naudeĩ aug mudureĩ bun ibodõf! Aya to kababal fiyauf. Gama sain enei bunem ilef, aya haiden gedin alauf.”

⁷ Pol age ye fen, Juda neid uub fõ itor ken, Negur yana yalesedig tamo Titius Justus nẽ fõ bun ilen, fõ are Juda neid uub fõ anĩ non. ⁸ Krispus, Juda neid uub fõ nẽ mudur, ã yogon ibor ganan

geid, Odug nigin momoi den. Korin tamo kayau museig biya od karĩ de fen, momoi den. Age dife di, naan dalen.

⁹ Bõ taka bun, Pol mala seleulã kurãf fen, Odug ĩ wogõ fiyẽ mog, karĩ yen, “To kumĩ wo, õ od wogõya tobol wof ulauf, ait to ufokalauf, ¹⁰ ere nigin, aya õ ado. Taka nem to irounokon, tadũ yõf, ere nigin, taun enei bun, neu tamo kayau musei dibodok.” ¹¹ Anĩ nigin, Pol ĩ yar tekelei ado ogõ sigis an ibod ken, tamo kayau Negur nẽ od ifelnẽdin.

¹² Galio ĩ Akaia provins nẽ gawaman mudur ibod mog, Juda tamo kayau idi weim kori de, Pol kiwai difen ken, ĩ kot bun diroulen. ¹³ Idi diron, “Tamo enei neda lo wal fe fen, tamo kayau waud yale di, Negur yana, tobonunã fire bun dalesauf nigin age fef.”

¹⁴ Pol od wogõ you fenẽ mog, Galio ĩ Juda tamo kayau irokenẽdin, “Juda tamo kayau ã, mosor be, tobonunã sane nigin urokanagauf are, aya ã karĩ yeĩya nigin kisi feleya. ¹⁵ Anĩ ere, morõ enei, od nigin, yeneid nigin ado, ãgenei lo nigin ouf are, ã aug madur gouf. Aya age fediya to es afouf.” ¹⁶ Age ye fen, ĩ idi kot bun irudidin. ¹⁷ Age fe di, idi Juda neid uub fõ mudur Sostenes dale fen, kot fofomala bun dun. Anĩ ere, Galio to eweid yon.

Prisila, Akwila, Apolos Anidim

¹⁸ Pol ĩ oun Korin taun naa musei ibodon. Agef fen, ĩ momoiya tamo kayau itorneĩd fen, Prisila Akwila ado weim waag dale, Siria distrik dilen. ĩ fau waag sõya sã mog, Senkria taun an yogon fatiya gudũ difelen, ere nigin, ĩ Negur mala bun

wau kuturol fen, iron, age afouf yen. ¹⁹ Idi Efesus taun wowã den, an Pol, Prisila Akwila ado itornëdin. Pol ï yogo Juda neid uub fõ bun ile fen, Juda tamo kayau geid od kuruwa difen. ²⁰ Ï idi geid sain naal meluk dibodõf nigin dirokenë di, itoron. ²¹ Anï ere, ï ilau fenë mã, idi irokenëdin, “Negur orouf are, aya kelauf.” Age ye fen, ï waag bun Efesus taun itor ilen. ²² Pol ï Sisaria taun kutü yeis fen, Jerusalem isel, sios aan fiyëdin. Agef fen, ï Antiok taun isilen.

²³ Pol sain naal an Antiok taun ibodkele fen, anenem fã ye, Galesia provins ado Frigia distrik ganan bun iyo ken, dõ fiya tamo kayau ganan megeir fiyëdin.

²⁴ Sain anï bun, Juda tamo taka yana Apolos, Aleksandria fõ morou, Efesus isin. Ï keleï biya ado tamo, Negur në Itotoya bun ibodok anï nigin keleï biya bagai ado. ²⁵ Ï Odug në naab anï difelnen, age dife di, ï total ado wogõ ye fen, Jesus nigin tutuk bagai ifelnëdidig, anï ere, ï Jon në naan igüya anï dogol kelein. ²⁶ Ï Juda neid uub fõ bun, kumï sã od wogõ yen. Prisila Akwila ado, ï wogõ yen anï karï de fen, idi ï dogo neid fõ bun dale diroule, Negur në naab tutuk faded difiyen.

²⁷ Age difel fen, Apolos Akaia provins bun ilauf nigin age fe di, momoiya tamo kayau idi ï wau dales fen, Akaia teneub an dõ fiya tamo kayau ï aan difiyëf nigin, pas ditotkenëdin. Apolos an wõ ye fen, Negur në wau ifenëya bunem momoi den idi, fatuk bagai isennëdin. ²⁸ Ere nigin, ï Juda tamo kayau geid mal atun fefe de fen, od megeir

ado nem lai feid fen, Negur nē Itotoya bun Jesus ī anī Kristus ya anī, agef ifelnēdin.

19

Pol Ī Oun Efesus Taun

¹ Apolos ī fau Korin taun ibod mog, Pol ī teneub atu iyok ile, Efesus taun wō yen. An ī, dō fiya tamo kayau tunī fotou fiyeīd fen, ² to fiyēdin, “Ā momoi ge fen, Awa Uur Fateul walegen de?”

Idi ī dirokenen, “Sā, amā Awa Uur Fateul ibodok ya anīg to karī maun.”

³ Age de di, Pol idi to fedin, “Age fiyauf are, ere naan anī ā walegen?”

Idi ī dirokenen, “Jon nē naan igūya anī.”

⁴ Pol iron, “Jon nē naan igūya are wau faleiya nē naan igūya. Jon ī yogo, dumen tamo taka isif ī nigin momoi douf nigin, tamo kayau irokenēdin, tamo are Jesus.” ⁵ Idi od enei karī de fen, Odug Jesus yana bunem naan dalen. ⁶ Pol ima tetedin ino di, Awa Uur Fateul idi bun isin. Age fe di, idi od fire fire nem wogō de fen, profet odeg wogō den. ⁷ Idi ganan tamo tuwelf age fiya.

⁸ Pol Juda neid uub fō bun ile fen, an ogō towo bun, kumī sā od wogō yen, ī tamo kayau geid od kuruwa de, idi waud falei ye, Negur nē tano nigin momoi douf nigin age fen. ⁹ Anī ere, idi tunī waud total le fen, to momoi den. Age dife fen, idi mal atun Odug nē naab nigin od sesen diron. Anī nigin, Pol idi itorneīd fen, dō fiya tamo kayau geif fen, naa ganan Tiranus nē ifelnēya fō bun od katō difen. ¹⁰ Enei age fen are yar uru ilelen, anī bunem, Juda tamo kayau ado, Grik tamo kayau

ganan Asia provins an dibodon idi, Odug nē od karĩ den.

¹¹ Negur ĩ Pol bunem memelik fire bagai age fedin, ¹² are hankisip ado gabar masakeg, Pol bouwa kobũ dife fen, dagi tamo bun diroule dinodi di, dagi el feledin, are kaa sesen idi ditornēdin.

¹³ Juda tamo tunĩ, kaa sesen dirudiyouf nigin diyōdig, idi kaa sesenem dirounēdin anidi bun Odug Jesus yana dale fen, idi eig de dirōdig, “Jesus ĩ nigin Pol wogō yedig, ĩ yana bunem, aya ō ulō wesiyouf nigin arokonok.” ¹⁴ Juda neid pris odug taka, Skeba nē gere tar sewen idig age difedig.

¹⁵ Naa taka bun, kaa sanem idi irokenēdin, “Aya Jesus keleĩ, aya Pol nigin keleĩ, anĩ ere, ā aiyaim?”

¹⁶ Age ye fen, tamo kaa sane ado tetedin gurusã ye, ganan lalai feid fen, fatuk bagai idenēdin. Age fe di, idi fō anĩ bun tamal, gemũ naud adodo diyalelen.

¹⁷ Juda tamo kayau ado Grik tamo kayau Efesus taun dibodon idi, enei karĩ de fen, idi ganan fatuk bagai kumĩ de, Odug Jesus yana ilun bagai dalesen. ¹⁸ Tamo kayau momoi den musei disi, sane age difedig anĩ, mal atun yaor dife, kurō difesin. ¹⁹ Idi idegēya bunem kosē dedig musei, dogo neid buk kori fiya guri de dirousi, kuru de, mal atun yã diraran. Idi buk kori fiya anĩ nē mala diwesen, are fifti tausen silwa moni* wō yen. ²⁰ Anĩ bunem, Odug nē od bilalaũ fe fen, megeiref ilen.

²¹ Enei ganan agef wō yele di, Pol Masedonia ado Akaia provins atu iyok ile anenem, Jerusalem

* **19:19:** Silwa moni tekelei are, naa tekelei bun kabĩ tamo nē mala.

ilauf nigin kisi yalen. Ī iron, “Aya an wō au fen, aya Romeg ki afouf.” ²² Age ye fen, ĩ yogon isennēya tamo uru, Timoti Erastus ado Masedonia provins bun sur feid fen, ĩ Efesus an Asia provins bun sain naal ibodon.

Efesus Taun Oun Kiwai Kuru Dalesen

²³ Sain anī bun, Odug nē Naab nigin, kiwai ado monēya odug wō yen. ²⁴ Silwa nem ereb ereb inoya tamo, yana Demetrius, ĩ silwa nem kayau waitou yana Atemis dedig anī nē tempel malakanon inodig, anī bunem yogon kabī tamo moni musei daledig. ²⁵ Demetrius ĩ, yogon kabī tamo tar ado, yogon kabī gen age fiya tutur iweig laisi fen, irokenēdin, “Tamo ā, ā keleī, ada kabī enei bun moni biya taledig. ²⁶ Anī ā gama uleg fen, karī gef, tamo Pol enei, ein Efesus ado mogo Asia provins ganan melsā bagai bun, tamo kayau musei waud yale fen, eig ye irok, tamo ima nem waitou inodif are anī waitou sã, yef. ²⁷ Are karīya sane yenek, ada neda moni kabī yana sane yalouf, takag, karīya sane yenek are, kayau waitou odug Atemis nē tempel are ege bagai kaũ sãf. Age fe di, kayau waitou, Asia provins ganan bun ado teneub adok ganan bun, yana dalesedig, ĩ yana odug iseledig are lai difesilauf.”

²⁸ Idi od enei karī de fen, fatuk bagai seye ise di, kakaĩ de diweig diron, “Efesus neid Atemis ĩ odug bagai!” ²⁹ Age de di, taun anī bun ganan kuru dalesen. Tamo kayau idi, Gaius Aristakus ado, are idi Masedonia temeleid Pol geid diyōdig anidi, kaka difeid, guru fiya nē fō odug namen, tamo tekeleim gudu ref ileya gen gududu den. ³⁰ Pol ĩ

guru fiya atun ilauf nigin age fen, anĩ ere, dõ fiya tamo kayau Pol katũ difiyen. ³¹ Asia gawaman nẽ uyu irouya tunĩ, are Pol nẽ mou tar idig, Pol guru fiya nẽ fõ anĩ bun to ilauf nigin digone ken, od sur difenen.

³² Guru fiya anĩ bun nene delen. Tunĩ od taka diweig dirõ di, tunĩ od fire taka diweig diron. Musei ganan ereb nigin an guru difen anĩ, idi keleĩ san. ³³ Juda tamo kayau, Aleksanda, tamo kayau wagedin mal atun sur dife, isel ifare di, tamo kayau tunĩ ĩ dile fen, Aleksanda ĩ anĩ morõ gariya den. Age dife di, Aleksanda ĩ tamo kayau meleid bun yogo bouwa isennẽf nigin, ĩ foro dalauf nigin imam dogol fiyẽdin. ³⁴ Anĩ ere, idi ĩ Juda tamo ya kelei ken, idi ganan aiteid tekelei dino fen, aua uru age fiya eig de diweig diron, “Efesus neid Atemis ĩ odug bagai!”

³⁵ Age de di, taun uyu irouya nẽ kabĩ tamo ĩ, tamo kayau foro weleg fiyẽdi di, foro delen, age dife di, iron, “Efesus tamo ã, teneub ganan bun tamo kayau ganan, Efesus taun anĩ, Atemis odug nẽ tempel ado yogon malakanon saa ilunem isin anĩ nẽ kulatun fiya taun anĩ, idi to keleĩ de? ³⁶ Taka nem enei wa fiya kisi feleya sã, anĩ nigin, ã foro weleg fen, age fiya nigin to buroro gei. ³⁷ Tamo eneidi ereb taka tempel buneg to bẽ dalen, idi neda kayau waitoug to kono difiyen, anĩ ere, ã idi ein guri wedig urousigel. ³⁸ Age fyauf are, Demetrius yogon kabĩ tura tar geid, tamo taka nigin nauseirya adouf are, kot ibodok, gawaman nẽ mudur adodo difaref. Idi an nauseirya anĩ diroulauf. ³⁹ ã nauseir anĩ teten

ereb taka manouf gouf are, tamo kayau neid kot guru fiya bun madur gouf. ⁴⁰ Gama wõ yel enei nigin, karīya sane yenek, kuru talesel enei nigin are ada kot bun dinenadauf. Age difouf are, ada guru fiya sane enei nigin faded fiya kisi feleya sã, ere nigin, are gariya sã.” ⁴¹ Agef irokel fen, ã guru fiya anĩ irudin.

20

Pol Masedonia Ado Grik Teneub Atu Ilen

¹ Kuru anĩ bure fele di, Pol ã od ino di, dõ fiya tamo kayau disin, age dife di, idi waud yales le fen, dabuo fiyeĩd lel, Masedonia provins ilen. ² Pol ã Masedonia provins atu iyok ile, wau yaleseya od musei tamo kayau irokenēdif ile, Grik kantri bun ulõ yeis fen, ³ ã an ogõ towo ibodon. ã waag bun Siria distrik bun ilauf nigin agef mog, Juda tamo idi, ã dukesiyouf nigin lalĩ difiyek anĩ karĩ yen. Anĩ nigin, ã Masedonia provins atu kel ilauf nigin kisi yalen. ⁴ Pirus naal Sopata Berea taun tamal, Aristakus, Sekundus Tesalonika taun tamal, Gaius Derbe taun tamal, Timoti, Tikikus Trofimus ado Asia provins temeleid anidim, Pol geid diyon. ⁵ Tamo eneidi idi ket Troas taun dile, an tari difaman. ⁶ Anĩ ere, Bret Yis Sã nẽ Sifa bure fele di, amã waag male, Filipai taun mator ken, naa faif ilele di, Troas taun wõ mau fen, fata mafiyēdin, an naa sewen mabodon.

Troas Taun Oun Yutikus Laa Bun Tamal Kel Turĩ Fiyen

⁷ Uub nẽ naa matu bun, amã weim bret mumã mafouf nigin guru mafalaisin. Pol tamo kayau od

wogõ fiyēdif ile bõ atunen, ere nigin, ï, we fele di, itornēdiyof nigin kisi fen. ⁸ Guru mafen nē aab ilun an, lam musei futu redin. ⁹ Tamo gaũ yana Yutikus, yau yaleya bobog ilun sō yesel ibod ken, mulã kusu yalen. Pol od wogõ yef ile mog, ï mulã kusu yalef ile yen kele fen, fõ ilunenem tenebur kubũ ye isilen. Age fe di, idi ï laa dalesnen. ¹⁰ Anĩ ere, Pol isil, tamo anĩ teten kubũ ye, kakarai fiye ken, iron, “To terēg, ï mata!” ¹¹ Age ye fen, ï baban fõ ilun isel, bret mumãf fen, yon. Ì wogõ yef ile we fele di, ï itorneĩd ilen. ¹² Tamo kayau, tamo gaũ anĩ mata dale dirou, fõ bun dile fen, waud el bagai fen.

Pol Efesus Sios Neid Uyu Irouya Dabuo Fiyēdin

¹³ Amã ket waag bun mele, sō mau fen, Asos taun melen, an Pol waag bun malouf nigin kisi mafen. Pol ï, amã age mafouf nigin tetun irokana-man, ere nigin, ï ye naab iyok ile, an ilauf yen. ¹⁴ Ì oun Asos fotou famã di, amã ï waag bun male fen, Mitilin taun melen. ¹⁵ Anenem waag bun mele, we fele di, Kios nuyo non wõ maun. Naa anĩ ile di, Samos taun mele wõ maun, naa anĩ ile di, Miletus taun mele wõ maun. ¹⁶ Pol ï, Asia provins bun an sain taka to ilalauf nigin, waag bun Efesus wal fouf nigin kisi yalen, ere nigin, kisi falauf are, ï Jerusalem Pentikos naa bun wõ youf nigin sibuyen.

¹⁷ Miletus taun an, Pol ï Efesus sios neid uyu irouya fata difiyēf nigin od sur fen. ¹⁸ Idi disi wõ de di, ï irokenēdin, “Aya Asia provins bun, uruwa bagai asi wõ au fen, aya ã geid tabod ken, sain ganan naig be afe abodon are ã keleĩ.

¹⁹ Juda tamo idi aya kiwai difana fen, kisi sane dinon anim fatuk bagai kisi fiyan, anĩ ere, aya wau aukesil, maru ado fen, Odug aruna alen.

²⁰ Ā keleĩ, aya ã isenneĩf nigin ereb taka wogõya bun to afon, are aya mal atun ado fõ fõ bun afelnein. ²¹ Aya Juda tamo kayau ado Grik tamo kayau idi waud falei ye, Negur bun dino fen, neda Odug Jesus nigin momoi douf nigin total bagai arokenēdin.

²² “Gama aya Awa Uurem toli fiyaf anĩ bunem, Jerusalem elef, an aya bun ereb wõ youf are aya keleĩ sã. ²³ Taun ganan bun Awa Uur Fateul, kalabus ado morõ tari difiyaf anĩ nigin wederou irouf, anĩ dogol aya keleĩ. ²⁴ Anĩ ere, aya neu naab adikalauf nigin ado, kabĩ Odug Jesus ifanan, are Negur nẽ wau ifenẽya nẽ biya od wogõya kabĩ anĩ bure afalauf nigin dogol, kisi afef. Anĩ kisi afalauf are, aya neu mata are ege au fen, neu mata nigin to kisi afef.

²⁵ “Aya ã atun ayo ken, Negur nẽ tano nigin wogõ ayein, are gama aya keleĩ, ã atun takam baban to ileyauf. ²⁶ Anĩ nigin, naa enei bun, aya tutuk bagai yaor afe arokeneik, tamo ganan neid naudeid nigin, aya neu mosor sã. ²⁷ Ere nigin, aya Negur nẽ oroya ganan yaor afe arokeneĩf nigin, taka to afokelen. ²⁸ Ā aug nigin ado, sipsip ganan Awa Uur Fateulem lo wedigouf nigin imeĩ bun inon anĩ nigin, meleĩ adouf. Negur nẽ sios, ĩ yogon naud bunem na yalen anĩ nẽ sipsip lo fiya tamo ubodõgouf. ²⁹ Aya keleĩ, aya atorneĩ mog, gaũ kuĩ sane ã atun disi, sipsip daũ difeidlauf. ³⁰ Ā tutur buneg tamo tunĩ fã de, dõ fiya tamo tunĩ

momoi bun tamal didegneïd fen, idi dō difediyouf nigin weleid dino diroulauf. ³¹ Anī nigin, ā lo welegei! Yar towo bun, bō ado gaa ado, maru ado ā mugu mugu ganan wedereī aroun anī karī walagauf.

³² “Gama aya ā, Negur ado yogon wau ifenēya nē od bun, aneneik, od anim ā totolouf nigin megeir ifenei ken, yogon momoiya tamo tar ganan atun, in akor mata ibodkeleya anī ifeneif.

³³ Aya takan nē silwa be, gol be, kolos yaleya nigin to wau yenen. ³⁴ Ā aug keleī, aya imau eneim kabī ale di, aya neu kabī turau tar geid, ereb lau mafen anī ifanaman. ³⁵ Ereb ereb ganan aya age afen anī bunem, aya ā afelnein, are ada kabī total age taf tale fen, anī bun tamalem maleg tasennēdiyof. Odug Jesus yogo eig ye iron anī karī taulauf, ‘Ifenēya are el fiya barikā, yaleya nē wal fiya.’ ”

³⁶ Pol ī od enei wogō yel fen, ī ibor bobou fe, idi ganan geid kosē den. ³⁷ Idi ī kakarai difiyē, umā difiye ken, ganan inā dalen. ³⁸ Idi ī nawa baban to dilouf fiyēdin od anim waud gudū fen. Age dife fen, idi weim waag bun dinenen.

21

Pol Jerusalem Ilen

¹ Amā dabuo mafiyeïd matorneïd fen, waag sō mau, Kos nuyo tokō mafelen. Naa anī ile di, amā Rodes nuyo mele fen, anenem Patara taun melen.

² Amā waag taka Fonisia distrik bun ile mog, fotou mafe fen, waag anī sō mau melen. ³ Amā Saipras nuyo mail fen, wal mafe, anī ki melem

Siria provins melen. Amã Taia taun kututũ maun, ere nigin, an waag udũ gei falaisiyouf nigin age fen. ⁴ Amã an dõ fiya tamo kayau fotou mafeid fen, weim naa sewen mabodon. Idi Awa Uurem Pol Jerusalem to ilauf nigin totol bagai dirokenen. ⁵ Anĩ ere, nemã sain bure fele di, amã matorneid fen, delẽ mayon. Dõ fiya tamo ganan dogo neid kayau kesu tar geid, taun tamal dinenamã, mele, maaĩ ubun ulõ maus fen, an amã iboramã bobou mafe fen, kosẽ maun. ⁶ Amã abob dabuo mafiye ken, amã waag sõ mau di, idi fonõ keku de dilen.

⁷ Amã Taia taun anenem tokõ mafel, Ptolemis taun kututũ maun, an amã momoiya tamo kayau aan mafiyeid fen, idi geid naa tekelei mabodon. ⁸ Naa anĩ ile di, amã matorneid mele, Sisaria taun wõ mau fen, an biya od wogõya tamo Filip nẽ fõ bun mabodon, ã kulu oun Jerusalem momoiya tamo sewen digirnẽdin anidi taka. ⁹ Filip ã, ne barai tar aiwa adodo tamo sãsã, idi profet od wogõ dedig.

¹⁰ An naa tunĩ mabodon, age mã mog, profet taka yana Agabus Judia distrik bun tamal isin. ¹¹ ã amã garan isi, Pol nẽ lũ yale fen, yogo ye ima ado ifofa ken, iron, “Awa Uur Fateul eig ye irok, ‘Jerusalem oun Juda tamo idi lũ enei nẽ marau eig de difo ken, haiden imeid bun dinenẽf.’ ”

¹² Amã od enei karĩ mau fen, amã an tamo kayau geid Pol Jerusalem to ilauf nigin magonen. ¹³ Age mafe di, Pol iron, “Ã ere nigin inã walege di, aya wau gudũ fef? Aya Odug Jesus yana nigin, Jerusalem oun difõyauf nigin ado laa fiyauf nigineg, dodok afel.” ¹⁴ Amã ã wala inoya kisi

feleya sa ken, folō mafiyē kele fen, moron, “Odug nē oroya anī kisi falauḡ.”

¹⁵ Age mafel fen, amā dodok mafel, Jerusalem meselen. ¹⁶ Dō fiya tamo tunī Sisaria taun temeleid dinenama ken, Nason nē fō bun ma-bodōf nē an dirouleman. Nason ī, dō fiya tamo uruwa bun temeleid anidi taka, Saipras nuyo tamal.

Pol Jerusalem Wō Yen

¹⁷ Amā Jerusalem wō mau di, momoiya tamo idi waud sere fiya ado aan difaman. ¹⁸ Naa anī ile di, amā Pol geid Jems mailauf nigin melen, sios uyu irouya ganan an difaren. ¹⁹ Pol idi aan fiyeīd fen, yogon kabī bunem Negur haiden atun ereb age fen anī, teke tekelei dir fenēdin.

²⁰ Idi od enei karī de fen, Negur yana dalesen. Age dife fen, idi Pol dirokenen, “Turamā, ō ulef, ganī tausen Juda idi momoi den, anī ere, idi ganan Moses nē Lo dō fiya nigin waud total bagai yenek. ²¹ Ō, Juda idi haiden neid teneub bun difaref ganan, Moses nē Lo ditor ken, dogo neid kesu tar mulū bun to dinenēdiyof, dogo neid tobonunā to dō difouf nigin ufelnēdin ya anī, idi mogo karī den. ²² Idi ō usil ya anī fau karī douf. Age difouf are, ada ere naig tafouf? ²³ Anī nigin, amā marokonok anī, ago dō wo. Tamo aiwa adodo Negur mala bun age mafouf bagai den, idi yeir amā geid. ²⁴ Tamo eneidi geid uleg fen, nonorou lilik fiya nē tobonunā bun ulagauf. Agog fen, na walekenēdiyof, ago di, idi fatiyeid korere difalauḡ. Ago ge di, ō nigin od enei are momoi sã, ō ogo Moses nē Lo dō wedig anī, tamo

kayau ganan keleĩ youf. ²⁵ Haiden tamo kayau idi momoi den anidi bun, amã kisi mafon anĩ matotkenẽdin, are idi saaf idegẽya waitou bun sesewi difen anĩ to dãf, yaro naud adodo to dãf, yaro uleid kakã difeid fen, didenkesif anĩ to dãf ado, noli tobonunã bun to dilauf.”

²⁶ Naa anĩ ile di, Pol tamo anidi geif fen, ã yogo weim nonorou lilik difen. Age difel fen, ã tempel bun ile, ere sain nonorou lilik fiya naa bure fele di, idi mugu mugu sesewi difouf anĩ, pris keleĩ youf nigin irokenẽdin.

Rom Kusĩ Tamo Pol Dalen

²⁷ Naa sewen anĩ bure falau fenẽ mog, Juda tamo tunĩ Asia provins temeleid idi, tempel bun Pol dilen. Idi tamo ganan waud dalese di, seye de fen, Pol dale, ²⁸ diweig diron, “Israel tamo, usennamãg! Tamo enei anĩ, neda tamo kayau, neda lo ado, modoũ enei nigin, od sane teneub ganan bun, tamo ganan ifelnẽdidig. Takag, ã Grik tamo tempel modoũ bun gurif isi di, fateul modoũ enei amuyẽ ifenen.” ²⁹ (Idi uruwa bun, Trofimus Efesus taun tamal, Pol ado an taun diledin, anĩ nigin, idi kisi difen, Trofimus Pol im tempel modoũ namen iroulen den.)

³⁰ Taun tamo kayau ganan fafã de fen, naab uyu fire fire bunem gududu de disin. Idi Pol dale, tempel bun tamal dĩ de diror diroule di, kaisã bagai sukar kotũ difeledin. ³¹ Idi Pol dukesiyou fenẽ age de mog, od isel, Rom kusĩ tamo neid odug, Jerusalem taun tamo kayau ganan kuru dalesef ya anĩ karĩ yen. ³² Kaisã bagai, kusĩ tamo neid odug ã, kusĩ tamo neid orowa tunĩ ado kusĩ

tamo geif fen, tamo kayau musei gedin gududu de disilen. Tamo kusĩ dalesen idi, kusĩ tamo neid odug ado yogon kusĩ tamo geid dileid fen, Pol dun anĩ folõ difelen.

³³ Kusĩ tamo neid odug isi, Pol dale, sen uru nem difõf nigin iron. Age ye fen, Pol ĩ ai anĩ, ereb ĩ age fen anĩ ado nigineg, Juda tamo to fiyẽdin.

³⁴ Tamo kayau musei atun, tunĩ od gariya fire diweig diron, tunim od gariya fire taka diweig diron. Kusĩ tamo neid odug ĩ, idi kuru dalesen nigin momoi od yaleya kisi feleya san anĩ nigin, ĩ Pol kusĩ tamo neid fõ bun dirou dilauf nigin irokenẽdin. ³⁵ Pol lata garan wõ ye mog, tamo musei idi didid aus fele di, kusĩ tamom Pol faali difiyen. ³⁶ Tamo musei idi dõ difeid fen, diweig diron, “Ukesig!”

Pol Tamo Kayau Musei Wogõ Fiyẽdin

³⁷ Kusĩ tamo idi, Pol kusĩ tamo neid fõ aaben diroulau fenẽ mog, ĩ kusĩ tamo neid odug to fiyen, “Aya od taka tau arokonõf?”

Ĩ aba solof iron, “Õ Grik od wogõ wodig de? ³⁸ Õ Isip tamal sã de? Kulu gawaman kiwai wene ken, gerere tuan fo tausen kiwai tamo uyu urou ulen anĩ.”

³⁹ Pol iron, “Aya Juda tamo, Silisia provins oun Tatus taun tamal, taun yana ado nẽ fõ morou. Utorna len, tamo kayau od arokenẽdiyof.”

⁴⁰ Kusĩ tamo neid odug yo fiyẽ di, Pol lata bun ifar fen, tamo kayau imam fiyẽdin. Idi ganan foro dele di, Pol Hibru od nem irokenẽdin,

22

¹ “Turau tar ado dei geg, gama aya yug nigin isennēya od enei karī wog.” ² Pol Hibru od nem irokenēdi di, karī de fen, idi fatuk foro delen.

Age dife di, Pol iron, ³ “Aya Juda tamo, Silisia provins oun Tasmus taun an wō au fen, taun enei bun biyaun. Aya Gamaliel bun tubuda tar neid lo nigin tai fiya fatuk alen. Age afe fen, ā ganan gama ago gef gen, ayag Negur nigin kisi total alen. ⁴ Aya Naab enei dō difedig tamo kayau, darau afeneīd fen, adenkesin, tamo ado kayau gei afeid fen, kalabus araran. ⁵ Pris neid mudur ado, kaunsel neid uyu irouya ganan geideg, aya age afen anī nigin wogō douf. Aya tureid tar Juda idi oun Damaskus taun difaref anidi bun paseg idi bun ale fen, tamo kayau eneidi darau difenēdiyof nigin afofa ken, Jerusalem guri afeid alauf nigin an elen.

⁶ “Gaa atun age fiya, aya ele, Damaskus wō au fenē mog, kaisā bagai, lalan fula fiya taka saa ilun tamal aya bun fula felen. ⁷ Aya tenebur kubū au asil fen, ait taka wogō fiya mog, karī aun, ‘Sol, Sol, ere nigin ō aya daig wiyaf?’

⁸ “Aya to afen, ‘Oduḡ, ō aim?’

“Ī solof irokanan, ‘Aya Jesus Nasaret tamal, ō daig wiyaf anim.’ ⁹ Neu kabī turau tar fula fiya anī dilen, anī ere, idi ait wogō fiyan anī to karī den.

¹⁰ “Aya to afen, ‘Ere naig afouf?’

“Oduḡ iron, ‘Fā wale fen, Damaskus taun ule, an ō ereb agouf nigin Negur igirkonon anī ganan irokonōf.’ ¹¹ Neu kabī turau tar, imau gim de,

Damaskus dirouleyan, ere nigin, lalan fula fiya anim malau gugum kelen.

¹² “Tamo taka yana Ananias ileyauf nigin isin. Ì lo el fe dō fedig tamo, Juda idi an difaref ganan, ì nigin biya difiyēdig. ¹³ Ì aya sirun ifar fen, iron, ‘Turau, Sol, ò malā kelē yalauf!’ Sain anī bun bagai, aya ì ileya kisi feleyan.

¹⁴ “Age afe di, ì iron, ‘Tubuda tar neid Negur, ò yogon oroya keleĩ youf nigin, Madur Bagai Tamo anī ulouf nigin ado, ì awa bun od karī wouf nigin igirnon. ¹⁵ Ò ereb ulen ado karī won anī, tamo ganan bun ì nigin wogō wouf. ¹⁶ Anī gama ò ere tari wof? Fā wale, naan wale, ì yana uweigne ken, ogon mosor kulo wol.’

¹⁷ “Aya Jerusalem kelau ele fen, tempel bun kosē au mog, malau seleulā kurāf fen, ¹⁸ Odug wogō ye mog, ailen. Ì aya irokanan, ‘Gama nem, kaisā bagai Jerusalem utor ule, ere nigin, idi aya nigin ogon od to karī douf.’

¹⁹ “Age ye di, aya oron, ‘Odug, idi dogo keleĩ, are aya Juda neid uub fō fō bun ele fen, ò nigin momoi den anidi kalabus bun aneneid fen, adenēdidig. ²⁰ Takag, ogon od wogō yedig tamo Stiwen naud fi felen sain bun, ayag an afaren, ì dukesiyouf nigin wau iro ken, tamo idi ì dukesin neid kolos tari afen.’

²¹ “Age au di, Odug irokanan, ‘Ule, aya haiden gedin gerō sur ayōf.’”

Pol Ì Rom Tamo Anī Kurō Fesin

²² Tamo kayau musei Pol karī difiyek dile, ì od enei irō di, idi kakaĩ de fen, diweig diron, “Ukesig, tenebur tamal uraileg! Ì mata ibodōya to biya!”

²³ Idi diweig diro ken, dogo neid kolos dinukakã dirara ken, aas ilun diraran. ²⁴ Age dife di, kusĩ tamo neid odug, Pol kusĩ tamo neid fõ bun dirou dilauf nigin irokenēdin. Tamo idi Pol eig de diweig dirokenen anĩ nē gariya keleĩ youf nigin, Pol wagĩ difiye ken, to difiyēf nigin, ĩ irokenēdin. ²⁵ Idi ĩ wagĩ difiyēf nigin yaĩ difiyē mog, Pol kusĩ tamo neid orowa an ifaren anĩ irokenen, “Ā, Rom tamo, mosor ado be ya kelei sa ken, wagĩ fiya are lo dõ fiya de?”

²⁶ Kusĩ tamo neid orowa od enei karĩ ye fen, ĩ kusĩ tamo neid odug garan ile fen, ĩ irokenen, “Õ ere naig wou fenē? Tamo enei ĩ Rom tamo.”

²⁷ Kusĩ tamo neid odug Pol garan ile fen, to fiyen, “Õ urokana, õ Rom tamo de?”

Pol ĩ iron, “Are momoi.”

²⁸ Age ye di, kusĩ tamo neid odug iron, “Aya Rom tamo wõ auf nigin, moni odugem na alen.”

Pol iron, “Anĩ ere, aya Rom tamo gõ difiyan.”

²⁹ Age ye di, tamo Pol to difiyēf nigin age difen idi, kaisã bagai folõ difelen. Kusĩ tamo neid odug ĩg, Pol ĩ Rom tamo, sen nem ifon anĩ weder fokõ yel fen, kumĩ yen.

Juda Neid Uyu Irouya Guru Fiya Meleid Bun

³⁰ Naa anĩ ile di, kusĩ tamo neid odug ĩ, Juda idi Pol bou bun od dun anĩ nē gariya tutuk bagai keleĩ youf nigin oron, anĩ nigin, ĩ Pol yalisne ken, pris odudug ado Juda neid uyu irouya ganan guru difouf nigin irokenēdin. Agef fen, ĩ Pol yale irusi, idi wagedin ifarnen.

23

¹ Pol guru fiya anī lo feid le fen, iron, “Turau tar, aya Negur kabī ifanan anī, wau karētut bagai ado age alef asi, gama naa enei bun.” ² Od enī irō di, pris neid mudur Ananias, tamo Pol non difaren anidi ī sigor daū difouf nigin irokenēdin. ³ Age ye di, Pol Ananias irokenen, “Negur ō inō irāf, ō pen lalaum garaī naki fiya! Ō lo kilei es wiyauf nigin an ubodok, anī ere, ō lo wal wo fen, aya dinauf nigin urokenēdif!”

⁴ Tamo Pol non difaren anidim ī dirokenen, “Ō Negur nē pris neid mudur kumī sā kono wiyek de?”

⁵ Age de di, Pol iron, “Turau tar, ī pris neid mudur anī aya to kelein. Are Negur nē Itotoya bun ibodok, ‘Ogon tamo kayau neid uyu irouya nigin od sane to urōf.’* ”

⁶ Age ye fen, Pol idi tunī Sadusia tamo, tunī Farisia tamo anī kelei ken, uyu irouya neid guru fiya mala bun iweig iron, “Turau tar, aya Farisia tamo taka, Farisia tamo naaluid. Aya laa bun tamal mata kel fāya nigin wau iseya ado nigin, kot bun afaref.” ⁷ Pol od enei irō di, Farisia tamo ado Sadusia tamo geid fefe de fen, guru fiya anī faraf uru fen. ⁸ (Sadusia tamo idi dirōdig, laa bun tamal mata kel fāya sā, engel sā, uureg sā, anī ere, Farisia tamo idi dirōdig, anī ganā are dibodok.)

⁹ Aiteid oduduge di, lo ifelnēdiya tamo tunī, idig Farisia bun temeleid fafā de fen, total bagai fe de diron, “Amā tamo enei bun kū fenēya taka to mailef. Ī uurem be engel takam be irokenen are,

* 23:5: Eksodas 22:28

naig fiyauf?” ¹⁰ Fefeya anī ile, sane le di, kusī tamo neid odug Pol fisik difouf ye fen, kumī yen. Anī nigin, ī kusī tamo disil, imedin tamal total ado son difeid, kusī tamo neid fō bun diroulauf nigin, irokenēdin.

¹¹ Bō anī bun, Odug Pol non ifar fen, iron, “Total uno! Ō Jerusalem ein, aya nigin wogō wol gen, ō Rom ouneg ago wogō wouf.”

Pol Dukesyouf Nigin Naab Dimiren

¹² Bonimeī di, Juda idi guru de fen, Pol yukesiya nigin kisi katō difen. Pol yukesiya sã mog, idi saaf ado naan to dāf nigin waud kuturol fen, od difon.

¹³ Tamo foti wal fiya anidim, enei nigin kisi katō difen. ¹⁴ Idi pris odudug ado uyu iroudiya bun dile fen, diron, “Pol yukesiya sã mog, amã erēb taka to māf nigin waumā kuturol fen, od mafon.

¹⁵ Anī nigin, gama ã uyu irouya neid guru fiya geid, tamomoi ge fen, Pol nigin tutuk bagai keleī youf ge fen, ī ã gein dirou disiyouf nigin, kusī tamo neid odug urokenēgouf. Amã, ī ein wōya sã mog, ī maukesiyouf nigin dodok mafef.”

¹⁶ Anī ere, Pol main nē naal kisi enei karī ye fen, ī kusī tamo neid fō bun ile fen, Pol irokenen.

¹⁷ Age ye di, Pol kusī tamo neid orowa taka iweignē isi di, iron, “Tamo gaū enei wale, kusī tamo neid odug gein roule. Ī od taka irokenēf nigin ado.” ¹⁸ Anī nigin, ī kusī tamo neid odug garan yale roule fen, iron,

“Kalabus tamo Pol iweigna fen, tamo gaū enei ō gein arou asiyouf nigin irokanal, ere nigin, ī od taka irokonōf nigin ado.”

¹⁹ Kusī tamo neid odug, tamo gaũ ima yale irou, yerin dile fen, to fiyen, “Aya ere od anĩ urokanau fenē?”

²⁰ Tamo gaũ iron, “Juda idi waud tekeleil, tamomoi de fen, Pol nigin tutuk bagai keleĩ youf de fen, nil uyu irouya neid guru fiya mala bun, ĩ diroulauf nigin dirokonoĩ. ²¹ Are idi to karĩ wiyēdiyof, ere nigin, tamo foti wal fiya anidim ĩ nigin dimin ken, tari difef. Pol yukesiya sā mog, idi saaf ado naan to dāf nigin waud kuturol fen, od difon. Idi dodok difel fen, Pol idi garan sur fiya nigin ogon yoya anĩ tari difef.”

²² Kusī tamo neid odug tamo gaũ anĩ weder irou fen, sur fen, “Õ enei urokanal anĩ, aib taka to urokenēf.”

Pol Sisaria Taun Diroule Dinene

²³ Age fel fen, ĩ kusī tamo neid orowa uru iweigneĩd, disi di, irokenēdin, “Kusī tamo tu hundred ado, kusī tamo sewenti hos adodo, kusī tamo tu hundred ot adodo anidim, bõ nain kilok Sisaria taun ulagauf nigin, dodok gouf. ²⁴ Pol teten ibod ken, Gawaman nē Mudur Feliks bun biya ile wõ youf nigin, hos tunĩ dodok gouf.”

²⁵ ĩ pas eig ye itoton:

²⁶ Aya Klodius Lisias,

Odug Gawaman nē Mudur Feliks aan ayok.

²⁷ Tamo enei Juda tamom dale fen, dukesiyou fenē age difen, anĩ ere, aya neu kusī tamo geid masi masennen, ere nigin, aya ĩ nigin kelein, ĩ Rom tamo. ²⁸ Idi ĩ bun od dun anĩ, aya gariya keleĩ youf nigin, ĩ dogo neid uyu irouya guru fiya bun aroulen. ²⁹ ĩ bun od dun are dogo

neid lo nigin age difen, anī ere, ī laa fiya nē be, kalabus ilauf nē ereb taka to age fen anī aya kelein. ³⁰ Aya ī dukesiyouf nigin naab dimirek ya anī karī au fen, aya kaisā bagai ī, ō gein sur afiyen. Ī bou bun od dun idig, ō malā bun nedi morō yaor difouf nigin arokenēdin.

³¹ Anī nigin, kusī tamo idi irokenēdin kilei, dō def age difen, idi bō Pol dale dirou, Antipatris taun dilen. ³² We fele di, idi, kusī tamo hos adodo, Pol geid dilauf nigin dirokeneīd fen, idi kusī tamo neid fō bun keku de dilen. ³³ Kusī tamo hos adodo Sisaria taun wō de fen, pas anī gawaman nē mudur difen ken, Pol ī ima bun dinon. ³⁴ Gawaman nē mudur ī pas anī iwes fen, Pol ī teneub nanī bun tamal anī to fiyen. Gawaman nē mudur ī, Pol Silisia provins bun tamal anī kelei ken, ³⁵ ī iron, “Aya ogon od, tamo ō bun od dun anidi ein disiyouf bun, karī auf.” Age ye fen, ī Pol Herod nē fō bun dinene ken, lo difouf nigin irokenēdin.

24

Pol Feliks Mala Bun Kot Fen

¹ Naa faif ilele di, pris neid mudur Ananias, uyu irouya tunī ado, lo keleī tamo yana Tertulus dedig geid, Sisaria taun disilen. Idi Pol bouwa bun od dūf nigin, gawaman nē mudur mala bun wō den. ² Anī Pol diweignē, isi di, Tertulus Feliks mala bun, Pol bun bou yūya od anī gariya ino irokenen, “Amā ō farumen wau inosiya sain meluk mabodok masin. Ogon lo fiya biya bun, neda teneub bun ereb ereb biya musei wowā

den. ³ Odug Feliks, modoũ ganan ado naab ganan bun, amã enei kelei ken, anĩ nigin fatuk bagai de mayok. ⁴ Anĩ ere, aya ogon sain to akasiyouf nigin, õ waũ ino ken, sain naal bagai karĩ wamãf nigin arokonok.

⁵ “Tamo enei morõ inoya tamo, teneub ganan bun, Juda tamo atun kuru yalesedig anĩ amã mailen. Ī Nasaret idegẽya momoiya mala neid uyu irouya. ⁶ Ī tempeleg amuyẽ ifenẽf nigin age fen, anĩ nigin, amã ĩ malen. ⁸ Õ* ogo tamo enei to wiyẽf are, od ĩ bou bun manof anĩ ganan momoi bagai ya anĩ, õ kelei youf.”

⁹ Juda tamo idi, ĩ bou bun od yũya bun megeir dife fen, are momoi, den.

¹⁰ Gawaman nẽ mudur, Pol wogõ youf nigin mudurem dogol fiyẽ di, Pol iron, “Aya kelei, yar musei õ teneub enei bun es fiya tamo ubodon, anĩ nigin, aya wau el fe fen, aya yug nigin megeir afouf. ¹¹ Malai sã, õ yaor bagai kelei youf, are naa tuwelf dogol mogo ilef, aya Negur yana alesauf nigin Jerusalem eselen. ¹² Aya bouwau bun od dun tamo idi kelei, aya aib taka ado tempel bun to fe maun be, Juda neid uub fõ bun be taun nameneg, tamo kayau waud to alesen. ¹³ Idi gama aya bouwa bun od duk are momoi yeya anĩ, õ ifelnõya kisi feleya sã. ¹⁴ Anĩ ere, aya Naab idi idegẽya dedig anĩ dõ afe fen, tubuda tar neid Negur yana alesedig, are momoi auf. Aya Moses

* **24:8:** Itotoya tunĩ eig de ditoton: malen. Age mafe fen, amã nemã lo kilei es mafiyẽf nigin age mafen. ⁷ Anĩ ere, kusĩ tamo neid odug Lisias isi, ĩ imaman tamal total ado son faman. ⁸ Agef fen, ĩ, tamo ĩ bou bun od dun anidi, õ gein disiyouf nigin irokenẽdin. Õ

nē Lo ado, profet neid buk bun ditoton anī ganan nigin, momoi auf. ¹⁵ Ayag tamo eneidi gen Negur bun wau iseya ado, are madur tamo ado tamo sesen laa bun tamal mata ke de fā douf anī. ¹⁶ Anī nigin, Negur mala bun ado tamo meleid bun, aya wau karētut abodōf nigin sain ganan kabī totol aledig.

¹⁷ “Aya yar tunī firen abodkele fen, aya neu tamo kayau maleg nigin safina wau sã ado, Negur bun sesewi fiya nē safina, Jerusalem arou asin. ¹⁸ Aya nonorou lilik afel fen, enei age afe mog, idi aya tempel modoū bun fotou difiyan. Aya an tamo guru fiya mala taka geid san, katã san. ¹⁹ Anī ere, Juda tamo tunī Asia provins temeleid an difaren anidi, dogo bagai õ gein disi fen, bouwau bun od yūya idi adouf are, wogō dem bagai. ²⁰ Sãf are, tamo eneidim, aya uyu irouya neid guru fiya meleid bun afaren sain, idi aya bun ereb mosor fotou difen anī wogō douf. ²¹ Tekelei dogol, aya idi meleid bun afar fen, aweig aron, are eig fiya, ‘Laa bun tamal mata kel fāya anī nigin, aya gama ã melein kot bun afaref.’ ”

²² Age ye di, Feliks ī yogo, Naab anī nigin keleī bagai, ī kot gudū fel fen, iron, “Kusī tamo neid odug Lisias isiyouf sain, aya ogon kot nigin od afōf.” ²³ Ī, Pol lo difouf, anī ere, ī karika difen ken, yogon mou tar ī ereb lau fef anī kulatun difouf nigin yo fiyēdiyof nigin, kusī tamo neid orowa irokenen.

²⁴ Naa tunī ilele di, Feliks ī aiwa Drusila Juda kayau ado disin. Ī Pol nigin od sur fe, isi fen, ī Kristus Jesus bun momoiya nigin wogō ye di, karī

yen. ²⁵ Pol ï Negur nē madur fiya nigin, tamo yogon oroya kulatun fiya nigin ado, es fiya fau isiyouf anī nigin dir fe di, Feliks ï kumī ye fen, iron, “Are de bure welef! Wadā ule. Sain biya adouf are, õ nigin od sur afouf.” ²⁶ De sain anī bun, Feliks ï, Polem moni ifenēf nigin oron, anī nigin, sain musei Feliks Pol nigin od sur fe fen, urom wogõ dedig.

²⁷ Yar uru ilele di, Porsius Festus, Feliks nē modoũ yalen. Anī ere, Feliks Juda tamo meleid yalouf nigin, Pol kalabus bun itornē ibodon.

25

Pol Festus Mala Bun Kot Fen

¹ Festus provins anī bun wõ ye, naa towo ilele di, ï Sisariam Jerusalem iselen, ² an pris odudug ado Juda neid uyu iroudiya geid, ï mala bun wõ de fen, Pol bou yūya od anī dirokenen. ³ Festus ï wau ifeneĩd fen, Pol Jerusalem sur fe di, ilauf nigin total bagai dirokenen, ere nigin, idi naab luwen dimin ken, Pol dukesiyouf nigin dodok difen. ⁴ Age de di, Festus ï irokenēdin, “Pol oun Sisaria kalabus bun ibodok. Aya yug mogo an alau fenē. ⁵ Anī nigin, tamo anī ereb kũ fenen ouf are, āgenei uyu irouya tunī aya weim Sisaria mele fen, an ï bou yūya od wogõ douf.”

⁶ Festus ï idi geid, naa eit be ten dibodkele fen, Sisaria isilen. Naa anī ile di, ï es fiya modoũ bun ibod ken, Pol ï wagen dirousiyouf nigin irokenēdin. ⁷ Pol wõ ye di, Juda idi Jerusalem temeleid disin ï salili difiye ken, ï mosor sane

bagai inon de fen, ï bou yūya od musei diron, anī ere, idi anī nē gariya to yaor difedin.

⁸ Age dife di, Pol yogo nigin isennēya od iron, “Aya Juda neid lo nigin, tempel nigin, Sisa nigin be, ereb kū fenēya taka to age afen.”

⁹ Anī ere, Festus ï, Juda tamo ï nigin waud yenēf nigin wau iro ken, Pol irokenen, “Õ Jerusalem usel fen, boū yūya od eneidi nigin an aya malaun kot bun ufarauf de?”

¹⁰ Pol iron, “Aya gama Sisa nē kot bun yeir afaref, ein aya kot difiyau. Õ ogo keleï bagai, aya Juda tamo bun kū fenēya taka to anon. ¹¹ Anī ere, aya laa nē mosor taka anon ouf are, aya laa nigin to atorok. Anī ere, Juda tamo eneidi bouwau bun od dun anī momoi sâf are, aya taka nem idi imeid bun inenaya kisi feleya sã. Aya Sisa bun kot afouf.”

¹² Festus ï, yogon lo keleï tamo geid, katõ difel fen, iron, “Õ Sisa bun kot afouf wol. Õ Sisa gein ulauf.”

Festus Pol Nigin King Agripa To Fiyen

¹³ Naa tunī ilele di, King Agripa Bernis ado, Festus aan difiyēf nigin Sisaria taun disin. ¹⁴ Idi naa musei an dibodõ di, Festus Pol nigin king ado katõ de fen, ï iron, “Feliks ï, kalabus tamo taka ein itornen ibodok. ¹⁵ Aya Jerusalem ele di, pris odudug Juda neid uyu irouya geid, ï bun bou yūya od dirou disi fen, ï mosor ado afiyēf nigin dirokanan.

¹⁶ “Anī ere, aya arokenēdin, Rom neid tobo-nunã bun, tamo taka bou bun od duk ï, yogon kiwai tar meleid bun ifar fen, bou bun od dun

anĩ nigin, yogo bou isenněya od wogõya sã mog, are kaisã tamo anidi imeid bun to dineněf. ¹⁷ Idi aya weim ein masi fen, aya to foi aun, we fele di, aya es fiya modoũ bun abod ken, tamo are dale dirou disiyouf nigin arokenědin. ¹⁸ Yogon kiwai tar fã de wogõ den, anĩ ere, aya mosor kisi afen anĩ nigin taka to bou bun dun. ¹⁹ Anĩ ere, idi dogo neid momoiya nigin ado, laa tamo yana Jesus, Pol ĩ nigin mata ibodok yedig anĩ nigin, ĩ geid fefe den. ²⁰ Aya enei nigin naig afe tutuk keleĩ youf au fen, nene aun, anĩ nigin, aya ĩ Jerusalem ile fen, bou bun od dun enei nigin an kot bun ifarauf nigin to afiyen. ²¹ Anĩ ere, Pol ĩ kusĩ tamom lo difiyě dile, fau dum Sisam es fiyěf nigin irokanan. Anĩ nigin, aya ĩ lo difiyek dile, ĩ Sisa gein sur fiya nigin naab amir ken, sur afiyěf sain bun anĩ nigin arokenědin.”

²² Age ye di, Agripa Festus irokenen, “Aya yug tamo enei karĩ afiyě feně.” Festus iron, “Õ nil karĩ wiyěf.”

Pol Agripa Mala Bun Ifaren

²³ Naa anĩ ile di, Agripa Bernis ado, biya biyamã de disisi, guru fiya fõ aaben, kusĩ tamo neid odudug, taun ně yu iroudiya geid dilen. Festus irõ di, Pol aaben dirou disin. ²⁴ Festus iron, “King Agripa ado tamo ganan weim tafaref ã, tamo enei ulegef. Juda tamo kayau ganan Jerusalem ado ein Sisaria, ĩ nigin total bagai dirokanan. Idi ĩ mata to ibodõf nigin diweig diron. ²⁵ Aya, ĩ laa foug ně ereb taka to age fen anĩ ailen. Anĩ ere, ĩ Sisa bun kot foug nigin iron, anĩ nigin, aya ĩ Rom sur fiya nigin kisi afon. ²⁶ Anĩ ere, aya ĩ nigin ereb od Sisa

bun atotkenēf anī yaor sã. Anī nigin, aya ã ganan meleĩ bun ĩ arou asil, King Agripa õ bun bagai, anī bunem aya ĩ to afiyē kelei ken, ĩ nigin ereb od itotoya nigin adouf be. ²⁷ Ere nigin, aya kisi afef, kalabus tamo ĩ ereb mosor inon anī to yaor mog, sur afouf, are to biya.”

26

¹ Age ye di, Agripa Pol irokenen, “Aya õ ogo nigin wogõ wouf nigin arokonok.” Anī nigin, Pol imam fe fen, yogo isennēf nigin wogõ yen, ² “King Agripa, bolē bagai, aya gama õ malã bun afar fen, Juda tamo aya bouwau bun od dun anī ganan nigin, aya yug isennauf nē od wogõ auf. ³ Bolē bagai auf, ere nigin, õ Juda neid tobonunã ado luwa irouya anī ganan kelei. Anī nigin, õ folo reis fen, karī wiyauf nigin agonok.

⁴ “Aya kesu naalun naig be afe abodon are, Juda tamo ganan kelei. Uruwa bun, aya neu teneub bun abodon, age afe fen, Jerusalemeg abodon are idi kelei. ⁵ Idi aya nigin sain meluk kelein, anī idi orodiyouf are, idi sã wogõ douf, are ada neda momoiya mala bun, Farisia tamo idi lo total bagai dõ difedig anidi neid taka abodon. ⁶ Negur ada tubuda tar bun age afouf bagai fiyēdin anī bun, aya wau iseya ado, anī nigin, aya gama kot bun afaref. ⁷ Negur age afouf bagai fiyēdin anī nigin, ada neda ibor tuwelf, gaa ado bõ ado total bagai Negur aruna dales fen, anī kisi fele di, dilouf nigin waud iseya adon. O king, wau iseya enei nigin, Juda idi aya bouwau bun od duk. ⁸ Ere nigin ã, Negur laa tamo kel turĩ fiyek anī kisi feleya sã gef?”

⁹ “Aya yugeg, Jesus Nasaret tamal yana kiwai afenēf nigin ereb ereb ganan age afouf aun.

¹⁰ Are aya Jerusalem an age afen. Pris odudug bun yoya ale fen, Negur nē tamo kayau musei kalabus bun anenēdin. Idi laa bun dinenēdin sain, ayag idi laa bun dinenēdiyof nigin yo aun.

¹¹ Sain musei, aya idi darau afenēdiyof nigin, Juda neid uub fō fō bun elen, age afe fen, idi Negur kono difiyēf nigin nugo afiyēdin. Aya idi nigin nameu sane bagai yen ken, aya idi kafī fiya afenēdiyof nigin yaū tauneg elen.

¹² “De anī nigin sain taka bun, aya pris odudug neid od ado, yoya bun Damaskus taun elen. ¹³ O king, gaa atun age fiya naab luwe ele mog, aya saa ilun tamal fula fiya taka, gaa nē medeīya wal fiya, aya neu kabī turau tar geid bun, fula felen anī ailen. ¹⁴ Amā ganan tenebur kuku mau fen, ait taka Hibru od nem eig ye irokana mog, karī aun, ‘Sol, Sol, ere nigin ō aya daig wiyaf? Ō aa waila ado bun yē urak are, ō nigin malai bagai.’

¹⁵ “Age ye di, aya to afen, ‘Odug, ō aim?’

“Odug iron, ‘Aya Jesus, ō daig wiyaf anim. ¹⁶ Gama ō fā wale yem ufar. Aya ō bun wō aul, ere nigin, ō neu kabī tamo wō wo fen, ō aya nigin ereb ulen ado ereb afelnōf anī wogō wouf nigin agirnon. ¹⁷ Aya Israel tamo kayau bun ado haiden buneg asennōf. Aya idi bun ō sur ayok, ¹⁸ idi meleid fokō yel fen, gugum bun tamal lalan bun disiyof ado, Satan nē megeir bun tamal Negur bun disiyof, anī bunem idi neid mosor nigin weder tu keleya dale fen, aya nigin momoi de

fen, fateuledin anidi atun dogo neid modoũ gei difouf.’

¹⁹ “King Agripa, anĩ nigin, aya saa ilun tamal malau seleulã kurãf fen, ailen anĩ to adodon. ²⁰ Uruwa, oun Damaskus taun difaref anidi bun, Jerusalem ado Judia distrik ganan bun difaref anidi bun ado, haiden buneg, idi waud falei ye, Negur bun falei dife fen, ereb age difef bunem, idi waud falei yen anĩ yaor difouf nigin wogõ aun. ²¹ Anĩ nigin, Juda idi tempel modoũ bun daleya fen, dinakesiyou fenẽ nigin age difen. ²² Anĩ ere, Negur aya isennaf isi, gama naa enei bun, anĩ nigin, aya ein afar fen, nanaal ado odudug bun wogõ auf. Aya Moses profet geid agef wõ youf den anĩ to adod ken, wogõ auf, ²³ are Kristus darau yale fen, ĩ ket laa bun tamal mata kel fã ye fen, Israel tamo kayau ado haiden geid bun, fula fiya anĩ nigin kurõ fesiyouf anĩ.”

²⁴ Pol yogo bouwa isennẽf nigin od enei wogõ ye di, Festus iweig iron, “Pol, õ wadã inok. Ogon keleĩ odug anim wadã bun irouleyok.”

²⁵ Pol iron, “Odug Festus, aya wadã sã. Ereb aya orok enei are momoi, gariya ado. ²⁶ King ĩ enei nigin keleĩ, anĩ nigin, aya kumĩ sã wogõ ayok. Aya momoi auf, are enei taka ĩ mala bun to iminen, ere nigin, enei iminẽyan to wõ yen. ²⁷ King Agripa, õ profet ganan nigin momoi wof de? Aya keleĩ, õ momoi wof.”

²⁸ Age ye di, Agripa Pol irokenen, “Õ kisi wof, are sain tobega eig fiya bun aya Kristen wõ auf nigin neu kisi falei wouf de?”

²⁹ Pol iron, “Sain tobega be, sain meluk, aya Negur kosē afiyēdig are ō nigin dogol sã, ganan gama aya karī wiyagef āg, aya gen wowã gouf nigin, anī ere, sen enei dogol anī to difōyeif.”

³⁰ Age ye di, king, gawaman nē mudur, Bernis ado, idi weim dibodon ganan fafã den. ³¹ Age de fen, idi aab ditor dile, abob diroken ken, diron, “Tamo enei ereb taka laa foug nē be, kalabus ileya nē to age fef.”

³² Agripa Festus irokenen, “Tamo enei Sisa bun to kot fem are, ĩ yalishnēya kisi feleyam.”

27

Pol Waag Bun Rom Ilen

¹ Amã* waag bun Itali kantri malauf nigin od difō di, Pol kalabus tamo tunī geid, kusī tamo neid orowa taka yana Julius ima bun dinenēdin, ĩ Sisa nē Kusī Mala bun tamal taka. ² Amã waag taka, Adramitium taun tamal Asia provins bun maaĩ ub ub ilau fenē agef mog, sō mau fen, melen. Aristakus, Tesalonika taun tamo oun Masedonia provins bun tamal, ĩ amã weim.

³ Naa ile di, Saidon taun wō maun. Julius ĩ Pol wau ifen ken, ĩ mou tar gedin ile fen, ereb ĩ lau fef anī difenēf nigin yo fiyen. ⁴ Anenem amã baban waag bun sō mau fen, Saipras nuyo wagenem melen, ere nigin, yau naaburamã gudū fen. ⁵ Amã Silisia ado Pamfilia maaĩ atu mele fen, Lisia provins bun Maira taun wō maun. ⁶ An kusī tamo neid orowa, Aleksandria taun tamal waag taka Itali kantri ilau fenē mog, ile fen, ĩ amã

* **27:1:** Luk ĩ Pol geid, sain anī bun waag bun weim dilen.

waag bun inenaman. ⁷ Amã naa musei, foinenem waag bun, Nidus taun non wõya nigin darau nem melen. Yau naaburamã gudũ fe di, amã Krit nuyo uyu Salmone wal mafe fen, Krit nuyo wagenem melen. ⁸ Amã darau kininem maaĩ ub dõ maf masil, modoũ yana Basis Biya dedig, Lasea taun non an wõ maun.

⁹ Naa musei ilelen, agef fen, waag bun ileya are mogo sane bagai len, ere nigin, naa are Kuriya Naa† dumen. Anĩ nigin, Pol wedereid iroun, ¹⁰ “Tamo, aya ailef are, neda waag bun delẽ sanel fen, waag adoi, udũ adoi, tamo adag daũf sa kalauf.” ¹¹ Anĩ ere, kusĩ tamo neid orowa, Pol wogõ yen anĩ to karĩ ye fen, waag irouya tamo ado waag marau idi neid od dõ fen. ¹² Basis are yau sain bun ifareya to biya nigin, musei ganan, waag bun tokõ mafel, Finiks wõ mau fen, an mabodõf nigin kisi difon. Finiks are Krit nuyo nẽ basis taka, gaa ileyan saut ado not melem wage ifenek.

Yau Uyẽ Ado

¹³ Yau saut melem foinenem fũ fe di, idi neid oroya kilei agef wõ yen anĩ kisi difen. Anĩ nigin, idi anka dĩ difesel fen, waag bun Krit nuyo maaĩ ub dõ de dilen. ¹⁴ Sain meluk ileya sã mog, yau odug total ado, yana ‘Gaa iseyan not tamal’ dedig anĩ, fã ye fen, nuyo bunem fũf irou isilen. ¹⁵ Yau odug total ado waag yũ di, waag yau bun ileya kisi feleya san. Anĩ nigin, amã waag ulum irouya matorõ di, yaum irouleman. ¹⁶ Amã nuyo naal taka Kauda dedig dumenem wal mafe fen,

† 27:9: Kuriya Naa anĩ, Israel tamo kayau mosor yaleleya nẽ naa.

isennēya nē waag naal darau nem dī mafen. ¹⁷Tamo, isennēya nē waag naal, waag odug teten dalesel dino fen, gama idi malū nem waag odug anī to fara foug nigin luwa filu difen. Idi waag, maaī kulum yana Sirtis bun sōya nigin kumī de fen, anka folō difesi di, yaum waag iroulen. ¹⁸Yau fatuk bagai waag yuk ile, we fele di, idi udū tunī naanū diraran. ¹⁹Naa anī ile di, idi imedim waag nē safina naanū diraran. ²⁰Naa musei, gaa ado barisa to mailen, agef fen, yau odug total ado de agef yenen. Anī bunem, amā isennēya malouf nigin waumā iseya ganan sa kelen.

²¹Tamo idi sain meluk saaf sã denek dilen nigin, Pol meledin ifar fen, iron, “Tamo ā, neu od Kitem waag bun to talauf nigin arokenein anī karī gem, are dem, ago gem are, daū fiya ado iraraileyā enei to fotou gem. ²²Anī ere, aya total unogouf nigin total bagai arokeneik, ere nigin, āgenei taka to fō yalauf, waag dogol narī foug. ²³Nor bō, Negur, aya yogon, aya ī aruna aledig, yogon engel sirun ifar fen, ²⁴iron, ‘Pol, to kumī wo. Ō de Sisa malan kot bun ufarauf. Negur ō wau ifon ken, ganan ō geid waag bun ulegef idi neid mata ō ifonon.’ ²⁵Anī nigin, tamo, total unogouf, ere nigin, aya Negur bun momoiya anof, are ī irokanan kilei fau agef wō youf. ²⁶Anī ere, ada nuyo taka bun sō tauf.”

Waag Narī Felen

²⁷Naa fotin nē bō anī bun, amā fau Meditere-nian Maaī bun yaum iroulemā mog, bō atun age fiya waag tamo idi teneub melsā melef ya anī kerē fedin. ²⁸Idi naan nē mala es difoug nigin

malū folō difele di, isil fen, naan nē mala foti mita dilen. Sain naal bagai dile fen, idi baban malū folō difele di, isil fen, naan nē mala teti mita dilen. ²⁹ Idi waag meein tuwa bun ileya nigin kumī de fen, idi waag dumen anka aiwa adodo folo folō difeledi di, disil fen, gaa nigin kosē den. ³⁰ Waag tamo idi, waag bun tamal diyalalau fenē nigin, idi isennēya nē waag naal folō difele di, maaīwō isilen, tamomoi de fen, waag uyu bun anka dirarāf nigin de fen, age difen. ³¹ Age dife di, Pol kusī tamo neid orowa, kusī tamo geid irokenēdin, “Tamo eneidi waag bun to dibodōf are, ā isenneīya to walogouf.” ³² Anī nigin, kusī tamo idi, malū isennēya nē waag naal ironun anī gudū difele di, ilen.

³³ We kurā fiya sā mog, idi ganan saaf dāf nigin, Pol ī total bagai irokeneīd fen, iron, “Naa fotin bun ā sii yei ken, saaf sā usigen, ā saaf taka to wōgen. ³⁴ Anī nigin, gama aya ā saaf wāgauf nigin total bagai arokeneik. Ā mata ubodōgouf nigin wāgauf. Āgenei taka, mudur bun fatiya tekelei bagai taka to kusuf irāf.” ³⁵ Pol od enei wogō yel fen, idi ganan meleid bun, ī bret tunī yale, Negur de fiyekel fen, mūf gariya ino yon. ³⁶ Idi ganan waud yalese di, saaf don. ³⁷ Amā waag bun mafaren ganan gu feleya are 276. ³⁸ Idi dakas kisi fele di, idi waag karikauf nigin, wit ganan maaīwō diraran.

³⁹ Lalan ise di, teneub uyu nain be ya anī idi keleī san, anī ere, alelei ub mumul ado anī dilen, kisi falauf are, idi an waag dirou dilauf nigin kisi difon. ⁴⁰ De sain tekelei bun maaīwō anka kokour de ditorarā yen ken, malū waag uyu gadi fiya nē

pul difon anī biru difeledin. Age difel fen, idi yau bun sel dalesel fen, yau difenē di, waag ubun irou ilauf nigin age difen. ⁴¹ Anī ere, maaī irak isi abob bun dūdig nē an, waag maaī kulum yu ken, anī teten sō yesen. Waag uyu degē fel fen, tonoya kisi feleya san, age fe di, waag ibu maaim yū di, faraf fisik fe irailen.

⁴² Kalabus tamo idi maaīwō to gaōgī de diyawauf nigin, kusī tamo idi didenkesiyouf nigin katō difen. ⁴³ Anī ere, kusī tamo neid orowa Pol isennēf nigin wau iro ken, kusī tamo idi dogo neid kisi to dō de age difouf nigin gudū felen. Idi yoyōya kisi feleya anidi, ketem waag bun tamal gurusā de fen, teneub bun dilauf nigin, ī ari fedin.

⁴⁴ Tunī ganan aa bun be, waag masasak bun an dilen. Anī bunem, idi ganan biya bagai totoū teneub bun wowā den.

28

Malta Nuyo Ubun

¹ Amā biya bagai ubun wō mau fen, nuyo are yana Malta ya anī kelein. ² Tamo kayau an temeleid waud fatuk bagai difanaman. Uyē isi fen, feluken nigin, idi yā kū dife fen, amā ganan aan difaman. ³ Pol ī aa were gurif fen, yā teten ino mog, gogour sane yā uruwam iru di, Pol ima bun degē felen. ⁴ Tamo kayau an temeleid, gogour anī Pol ima bun kuuri ye mog, dile fen, idi abob dirokenen, “Tamo enei tamo yukesiya tamo bagai, ere nigin, ī maaīwō tamal iyawol, anī ere, neda waitou Madur Fiya anim ī mata ibodōf nigin to oron.” ⁵ Age de di, Pol ī gogour wiri fe di, yā

malan isilen, anĩ ere, ĩ bun ereb taka to wõ yen. ⁶Tamo kayau ĩ ima dĩ youf be, kaisã bagai kubũ ye laa foug de fen, kisi difen. Anĩ ere, idi sain meluk lo difef dile, ereb taka ĩ bun to wõ yen anĩ dile fen, idi kisi falei del diron, ĩ waitou den.

⁷Teneub akor melsã are, nuyo anĩ nẽ mudur, Publius nẽ teneub ibodon. ĩ aan fama ken, yogon fõ bun gei famã iroule, naa towo el fe kulatun faman. ⁸Ĩ tama dagi di, fataren yenen, bouwa uruwa ado te fururũ yalen. Pol ĩ ilouf nigin ile kosẽ yel fen, ima teten ino di, dagi fara felen. ⁹Enei wõ ye di, nuyo bun dagi tamo tunĩ garan ĩ garan disi di, el feid ledin. ¹⁰Idi naab fire fire bunem el difama ken, amã waag sõ mauf nigin dodok mafe di, idi amã ereb ereb lau mafen anĩ difanaman.

Rom Wowã Den

¹¹Ogõ towo ilele di, amã, waag taka yau sain bun nuyo an si inon anĩ, sõ mau fen, melen. Waag are Aleksandria taun tamal, anĩ uyu bun, waitou aina ado Kastor Polluks ado meleidkanon dinon. ¹²Amã Sirakus taun wõ mau fen, naa towo an mabodon. ¹³Anenem amã waag bun mele, Regium taun wõ maun. Naa anĩ ile di, yau saut melem fã yen, baban naa anĩ ile di, amã Puteoli taun wõ maun. ¹⁴An amã momoiya tamo tunĩ fotou mafiyẽdi di, idi geid naa sewen mabodõf nigin dirokanaman. Age mafel fen, Rom taun masin. ¹⁵Momoiya tamo an, amã masif ya anĩ karĩ de fen, idi diyok disi, Apius Maket ado Tamo Yenẽya Fõ Towo bun an fotou difamãf nigin disin. Pol tamo anidi ileid fen, Negur de fiye ken, wau

megeir yalen. ¹⁶ Amã Rom wõ mau fen, Pol ï mugu kusĩ tamo takam tari fiyek dibodõf nigin yo difiyen.

Pol Oun Rom Kusĩ Tamom Tari Fe Mog, Biya Od Wogõ Yen

¹⁷ Naa towo ilele di, Pol Juda neid uyu irouya iweig laisi, guru dife di, idi irokenedin, “Turau tar, aya, neda tamo kayau ado, neda tubuda tar neid tobonunã to adodon, anĩ ere, aya Jerusalem oun daliya fen, Rom imeid bun dinenan. ¹⁸ Idi aya fele difiyale fen, dalisnau fenẽ age difen, ere nigin, aya laa nẽ mosor taka to anon. ¹⁹ Anĩ ere, Juda idi anĩ nigin kiwai dinon, aya neu tamo kayau nigin bouwa yũya od taka san, anĩ ere, naab taka san nigin Sisa bun kot afen. ²⁰ Gariya anĩ nigin, aya fotou ayei ken, ã geid wogõ tauf nigin to ayein. Israel neid waud iseya anĩ nigin, aya sen enei nem difõyan.”

²¹ Idi diron, “Amã õ nigin Judia distrik bun tamal pas taka to malen, agef fen, turada tar idi anenem disin õ nigin od taka be, od sane taka to dirokanaman. ²² Anĩ ere, amã ogon kisi anĩ karĩ mauf nigin waumã irok, ere nigin, amã keleĩ, tamo kayau teneub ganan bun, ogon momoiya mala enei nigin kiwai od wogõ dedig.”

²³ Idi Pol dilouf nigin naa taka dinon, naa anĩ bun, idi musei bagaim Pol ibodon nẽ an disin. Pol ï bonimei nem ile bõ, Negur nẽ tano nigin faded fiyeĩd fen, kurõ feis irokenedin, ï Moses nẽ Lo ado profet neid itotoya bun, Jesus nigin idi neid kisi falei ye fen, momoi douf nigin age fen. ²⁴ Tunĩ Pol wogõ yen anĩ bun waud falei yen, anĩ ere, tunĩ

to momoi den. ²⁵ Pol idikeleya od enei wogō ye di, idi dogo dogol fefe de fen, dilelen, “Awa Uur Fateul profet Asaia sigor bunem eig ye wogō yen, are ī tubuī tar momoi bagai od anī wogō fiyēdin:

²⁶ “Tamo kayau enei bun ule fen, urō,
 “ā wedereim karī gouf, anī ere, wedereī to fokō youf,
 ā meleim ulogouf, anī ere, meleī to fokō youf.”

²⁷ Ere nigin, tamo kayau enei, idi waud katī felen, idi wederedim karīya kisi feleya sā, age de fen, idi meleid difofakelen, age fiya sam are, idi meledim dilem, wederedim karī dem ado, idi waud fokō ye fen,

falei de di, aya idi el afedim.”*

²⁸ “Anī nigin, Negur nē isennēya haiden bun sur fen anī, ā keleī youf. Age fe di, idi anīg karī douf!”†

³⁰ Yar uru adok, Pol ī yogon fō na yaledig bun ibod ken, ī dilouf nigin disin ganan aan fiyēdin.

³¹ Kumī sā ado kafī fiya sā, ī Negur nē tano nigin wogō ye fen, Odug Jesus Kristus nigin ifelnēdin.

* **28:27:** Asaia 6:9, 10 † **28:28:** Itotoya tunī eig de ditoton: douf!” ²⁹ Pol od enei wogō ye le di, Juda idi dogo tutur fatuk bagai fefe de fen, dilelen.

Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 21 Feb 2024 from source files dated 31 Aug 2023

d7099f9d-3bdf-5620-8eb3-7e6c51cab7ea